

漢南碑傳彙

張一磨



二



190

虎尾高級中學圖書館
高中創設紀念文庫
分類
番號



滇南碑傳集卷五

晉寧方樹梅臞仙纂輯

明守令

化州同知楊公傳

李東陽

公姓楊諱景字某雲南安寧人也事母以孝聞性狷介不妄取少補州學生舉永樂癸卯鄉貢卒業國子拜霸州判官專領馬政政久弛逋課纍數歲官急徵馬數益耗公歎曰養馬者民也民困馬何由息乃與民約悉縱使就業期年而馬足會遭父喪民數百輩詣闕請奪情留公不得皆涕泣去服闋改澧州力益舉劇有卒失牛誣民吳姓爲盜州已成獄公疑之陰遣人置牛郭外縱之歸牛經卒門奔民家入其苙中卒乃服罪會九載秩滿民請留部使者六七至例不得復留擢化州同知峒夷亂賊千餘將攻城會久雨城寢壞民謀走徙號聲震天地守將夜縋城以遁公令曰吾在此毋恐時城中民兵不滿三百公激以義且示禍福皆願盡力乃撤故倉木以蔽城缺又縛藁人被衣鎧置城上以疑賊賊夜至攻甚急有三人緣堞上撿斬以徇賊知有備乃引去歐都督信在高州聞警以兵至則賊已遁歐大驚歎書守忠二字遺公而置守將於法公益治城練兵寇屢至無所獲遂不敢復犯民皆曰活我者楊公也方賊亂時有按察官夜至城下守城將啓關內之公執不可按察怒曰汝寇我邪公謝

曰。今日之事。城爲重。明日果聞有異服自稠人中遁去者。按察方欲報公。愧乃止。公每獲賊。旣鞫實。必誅而後報。或曰。法不當爾。公曰。脫有不虞。奈何。旣而鄰郡縛賊者。皆墮賊計。人益服之。化俗尙鬼。有廣西羅姓者。客死。民僞傳爲神。祠事之。公毀室。斧其像。妖遂息。天順庚辰。以老乞致仕。道巴陵。貧不能歸。因占籍焉。子一清。舉奇童。入翰林。登進士第。而公卒。家益貧。不能歸巴陵。一清乃葬公鎮江。比拜中書舍人。獲救進。公階儒林郎。封公配張氏太安人。時公已卒若干年矣。

太史氏曰。世恆謂處常易。處變難。其非然哉。夫自取舍至於利害。以極於生死。皆有際分。有所嚮。必有所辟矣。苟縱意恣欲。簞豆無所擇。而望其赴難徇義。蹈死而不顧。惡有是理哉。予與中書君遊。聞化州事。壯公所爲。及詢其恆居細行。固若是濯濯也。嗚呼。居小官。處僻地。能嚮義辟利。確然不爲變。不可謂不難矣。故著之。若化州事灼灼在人耳目者。固皆難之。豈俟論哉。

懷麓堂集

明故石阡府黃菲庵先生墓表

閔如霖

戶部員外郎黃君明良。遷貴州按察僉事。且行。持會魁周南石公誌其先大夫菲庵先生文。請予表其墓。初。先生爲敝邑師。予得侍焉。黃君與其兄好學。右文。予交雅善。先生逝矣。而予幸與黃君同官於朝。則其請曷敢辭。先生諱敏才。字性之。本姓孫。河南光州人也。五代時徙。

閩之連江。自御史中丞曉公傳數世。有諱同者。贅於黃氏。遂從其姓。同生繼。繼生榆。榆生章。永樂初。戍雲南。因家晉寧。以經學授徒。實先生之曾大父也。大父諱錫。父諱琮。松滋知縣。生五子。先生其次也。先生爲州學弟子。嘗適郊。見枯骨。惻然收而埋之。友人王朝死。貧無以葬。爲起墳。旣葬。歲時祭不輟。正德癸酉。領鄉薦。甲戌。會試中乙榜。授烏程訓導。先生頎而白皙。善爲容。教人先經術節行。自他邑受業者。門下常數十人。經其指授者。爲名士。督學副使劉公瑞。盛公端明。咸器重之。御史張公特薦於朝。己卯。典廣東鄉試。得才爲多。其冬。以會試隨松滋公入京師。明年。先生下第回。而松滋公卒。先生奔走扶襯。至辰州。會其鄉人定遠知縣王鉉客死。先生調棺給殮。與之同還。嘉靖甲申。服闋。補順天訓導。教如烏程法。慨文山公祠宇頽圯。捐俸葺之。攝昌平州事數月。有能聲。督學御史林公有孚。有志遠行潔。不愧爲儒之薦。乙酉。典湖廣鄉試。尤稱得人。丁亥。陞解州知州。歲惡。饑者盈道。先生移文上官。不俟報。輒散倉粟數千石。又疏於朝。請公帑以賑。旣而大疫。先生多製藥餌給療。以是解人全活不可勝數。逋盜王堂率衆入臨晉界。聲勢張甚。先生發兵守要害。設方略。勦捕殆盡。河東御史蔣公揚薦之。任解三年。績騰六異。於是陞九江府同知。解人懷之。祠於名宦。貌像立石。頌功德焉。至九江逾年。振廢禁姦。郡中肅然。築庾樓磯。濬龍開河。其利人甚大。至今賴焉。江洋寇平有功。金巡撫諸公交章譽薦。乙未。陞南京都督府經歷。翊贊句校。戎務聿興。九江人士爲樹

去思碑。實少宗伯涇野呂公所撰云。丙申。以太子覃恩。授奉直大夫。松滋公贈如先生官。母沈氏。封太宜人。妻胡氏。贈宜人。繼室王氏。封宜人。戊戌。陞石阡府知府。時方議征交趾。石阡有軍興之供。先生冒暑行。病卒於九江。止遺圖書數卷。既歸葬晉寧。鄉人慕先生之賢。請於朝。督學太宰古冲李公。特允建祠祀之。先生生於成化丙午五月十一日。卒於嘉靖戊戌八月初三日。享年五十有三。宜人胡氏。先先生卒。僉憲公先任晉州。考最。故先生進階中憲大夫。而胡贈恭人。王封太恭人。子男四。長明賢。娶陳氏。中甲午文魁。次明良。弱冠登乙酉榜。娶范氏。繼娶全氏。贈封宜人。明賢卒於九江。而明良授溫江知縣。轉知晉州。歷遷今官。次明輔。庠生。娶唐氏。三子皆胡出。明翊。庠生。娶徐氏。王出女三。庠生蕭策。舜。李輔耕。張典學。其壻也。孫男二。曰鶴。庠生。娶譚氏。曰豸。廩生。娶周氏。先生墓在牧羊山之陽。而胡恭人合窆焉。吾觀世人論仕者。必先問何起家。因而異視焉。嗚呼。此豈國家任官立政之意耶。若先生由鄉舉授教官。歷遷郡守。所至以經術緣飾吏事。卓卓有美績如此。而先生之父。以歲薦爲縣令。仲子明良。亦以鄉舉爲縣令。官至憲司。撫人以仁。律己以義。蓋三世稱循良矣。第先生志未竟而卒於官。爲可恨耳。書此表之。以慰先生於地下云。

晉寧州志

菲庵黃公鄉賢祠記

林一新

晉寧菲庵黃公起家鄉進士。歷官烏程順天二學司訓。晉知解州。同知九江府。入爲南京都

督府經歷。出知石阡府。卒於途。歸葬於晉寧。晉寧人士賢公之賢。嘉靖十八年。具聞於學憲李公。李公覆實。得祀於鄉。既而學憲余公。剏祠於州學東偏。以春秋祀。著爲典。一新有事。晉寧詣公祠右。詢所由秩祀者。晉寧人士類舉公。夙昔數歷績。敍暨居家鄉。可楷範者。來聞公知解州。值歲凶。發倉賑給。或言須俟報可。公不爲沮。所全活以萬計。其時有疫。不殍民。蝗不入境。嘉穀雙穗。硝池覆魚。瑞應。及在九江。作庾樓磯。疏龍開河。尤利賴於人民。兩郡去思。祠之名宦。最後交趾之役。石阡當督給軍興。公受命不退避。亟行酷暑中。遘疾途卒。公天性孝友。家庭整齊。而於賑貧恤死。尤惻惻然者。爲儒生時。治友人王朝喪。更襄葬之。座主龍御史。死於非罪。無後裔。悉力經紀。且哀其遺行。以傳鄉人。王鉉客死。公遇其櫬於辰陽。復爲周旋。還滇。公之賢。卒表於世者如此。迺今秩祀於鄉。非私也。嘗讀禮記祭法。以死勤事則祀。法施於民則祀。禦大災捍大患則祀。非此者不在祀典。公固與祭法相符矣。秩祀於鄉。非私也。爰撫拾爲記。俾州司碑之。亦期後此有觀而興者云。晉寧州志

長史孝子趙公德宏墓碑

李元陽

公諱德宏。字有容。南溪其別號也。先世爲蒙詔人。有趙奪帥者。於公爲始祖。後有諱堅者。生連。連生護。護爲鶴慶路知事。陞北勝州判官。酷好清淨。辭職不赴。作庵以居。遂爲鶴慶人。護生春。春生應。應生敏。敏生遠。贈奉直大夫。配李氏。封太宜人。生公之少也。家甚貧。所居隘

陋公能勤儉。增拓居室。以安二親。父除江西按察知事。奉差入京。病痢。公侍奉惟謹。知病且不起。痛不自禁。及父卒。假貸營殮。偕傭人肩柩以歸。跋涉萬里。無一日輟。傭人見其書生任勞爲之感動。既歸。廬墓三年。朔望日回家省母。省畢卽歸墓所。墓鄰曠夷。豺虎交跡。寂無人到。忽有一白犬來守其廬。郡守汪公標聞而異之。躬至墓所慰勞。餽贈有加焉。乙亥。服闋。丙子。領鄉薦。雲南巡按御史唐公龍濂知其孝。自慶得人。因以其孝行上聞。榜其居曰孝子趙氏之門。謁選授順慶府判府。有疑獄三案。皆死刑。久不能決。公一訊而決。洗其冤者十餘家。會歲歉賑濟。公設爲方略。全活甚衆。掩瘞暴露。無間遠邇。臺省獎勵之。使相屬於道。三年。遷潼川知州。公初至。惟以備荒爲志。凡贖錢自一錢以上。皆令買粟貯倉。居二年。得粟萬八千石。明年。蜀又大饑。死相枕藉。潼川以發倉得免。先是荒歉之後。民半轉徙。公至能勞來安集。復業者日益衆。城圯數十年。莫能築。公謂倉廩雖充。苟無城郭。民誰與守。遂力主其議。躬率畚鍤。糾惰獎勤。期月而竣。事。州當衝要。遞走馬驛。官損其名。民喪其業。公於州門作廐六十楹。聚馬而飼之。以次輪役。匪直革積弊。緩民力。卽馬畜皆得調適之節。民大稱便。州之三溪口。富斧並諸處盜賊。依山阻險。拒捕殺人。其來已久。公至立保甲。設社學。十餘所。親至其地。曲諭善導。不旬日。諸盜自縛渠魁而來。敬聽約束。自是境內晏然。嘉靖十二年。蜀滇二省土夷爭界。巡按以公素行爲鄉評所推。遂脅公戡治。有土舍高鵬者。以白金八百兩爲餽。公力

拒之。土人愧服。遂各吐所爭界。兩省並加獎薦。由是聲實益隆矣。方陪點河南僉事。會慶府缺長史。今上方重宗藩。而慶府又夙膺眷注。銓司慎輔導之任。因以公爲左長史。公至。以本藩舊事奏聞。勅放藩宗寧家者六十人。公爲長史六年。乞休之疏。凡七上。竟不得請。庚子。丁內艱。慶世子親賜弔慰。諸藩宗戀戀不忍別。巡按御史包公節。白公賁再旌其門。曰孝廉。公爲人樂易正直。與物無忤。宦轍所至。僚吏士民無不傾心。初在潼川。還戡爭界事。時百姓恐其長往。詣撫保留。相率二百餘人。扶老攜幼。不遠千里。若孺子之念慈母。何其得民之深也。詩云。有斐君子。民之不可諼兮。斯人之謂與。公以成化庚子十一月二十一日生。以嘉靖壬寅十月二十日卒。以明年十二月二十日葬於象眼山。李中溪全集

明奉直大夫知四川潼川州事張公墓表

李元陽

穴蒼山中峯者。張大夫新阡也。張大夫掛冠來歸。耳目步履矍矍強健。登高眺遠。與少年同作止。然其心以爲盡歸計矣。一日遊山至中峯。謂其子曰。斯山埋吾骨。子異而不應。曰。乘生氣。據王相。陽來陰受。支就阡合。冀發其子孫。斯何異於弗耕而餒。曰。天也。豈不悖哉。顧余有取焉。汝但識之。其子於是芟之柞之。樹之以松柏。后數年。勃勃焉。且成林矣。大夫見而喜。無何大夫疾。其子召醫藥。曰。汝猶望吾起耶。汝不識吾平居之語。汝母不識耶。吾少時力學。謂汝母曰。三十不第不再試。四十不仕不趨名。五十不歸。貪夫徇財。六十不休。衆庶馮生。昔吾

之爲是言也。詎敢必哉。乃所望則如斯之足焉。爾已矣。願幸三十第矣。四十仕矣。五十歸矣。今六十踰三年矣。尙不可休耶。夫壽命者數也。休咎者心也。醫藥者可以已病。不可以革數也。子第穴向者之山。毋翦伐其樹。斯我之志也。言畢。命峨眉冠拖紳。遷正寢。召賓友而卒。初。大夫之少也。倜儻自負。重然諾。讀春秋。以弘治戊午舉於鄉。再舉進士不第。授蜀之鄆都教諭。鄆都士人貧不能葬娶者。曰於我給。鄆濱江。觀音灘險。往往覆舟。大夫分俸募篙師。多所救活。歲饑。以粥糜濟人於道路。鄆人德之。繼遷敘州爲教授。以外艱去。復補順慶。三任爲學職。其施與如一日。上下稱賢。甲戌。遷資陽縣令。勤勞明敏。爲諸縣先。當路以其事布之儔輩。俾無譖者取則。由是他縣淹獄者皆願訴於大夫矣。茂州張遊擊死土番之變。其副芮參將熊指揮。未之援也。乃詭詞於兵備者曰。張墜馬死。軍衆潰奔。聽者不察。遂以爲然。其母上疏辯冤。經數官不能決。逮獄者千人。至是乃於大夫而檄之決。大夫果得其情。無所避忌。由是張之忠始得白。逮獄者得寧業。而大夫之名益起矣。庚辰。擢守潼川。甫至任。以疾致其仕。上官勉留。人士泣留。大夫不顧也。曰。五十吾歸矣。歸休十年。流連宴樂爲事。卒之日。命其子以田分族人之士者。拯人之命。不伐其功。史氏嘉焉。乃若孝弟事未著也。大夫初刻志舉進士。以妣王密輩不逮祿養爲恨。故欲迎其父節齋先生。乃俛首就鄆教。祿養喜色者數年。使其不以俯仰限引之。安知其不以文第顯著也。大夫生於成化某年。葬中峯之阡。配朱氏。懿德淑。

行無忝內助。子男三人。長治道。郡庠生。次治德。以庠生例聽典膳。皆朱出。季治策。側室余氏出。一女適庠生王尙賢。先卒。治道曰。我先世淮安山陽人。諱興者。洪武初從征滇。始徙大理。興生勝。勝生裕。裕生璽。是爲節齋先生。大夫名鳳羽。字拱辰。自號玉山先生。嘉靖乙未三月朔日。刻中谿李子之文。李中溪全集

敬庵先生墓表

楊士雲

我先生董公諱璧。字連城。號敬庵。學者稱爲敬庵先生。考諱銳。妣董氏。本趙姓。外祖諱繼先。無子。以先生後。因姓焉。幼穎敏。祖甚奇愛之。命稟學於先。郟令楊公廷玉。公師道尊嚴。少許可。獨稱先生。初爲郡弟子員。巡按肅軒郭公叩之。大異其文。遂名動士林。成化丙午。領鄉薦。一上春官。弗偶。弘治丙辰。中乙榜。以年限銓。署蒙化訓導。事爲祿養。且期再舉。在蒙模範科條。動則古人。士咸有造。壬戌。再上春官。弗偶。甲子。擢教諭。蜀之富順。教法如蒙。士益咸有造。部使者以優異聞。正德癸酉。擢知保寧巴縣。無何。巴爲州。改夔之太平。太平新設。在萬山中。流寇淵藪。大軍甫勘定。恃縣綏之。時瘡痍未瘳。荆榛滿目。公私赤立。庶事草創。先生摩撫經營。日不暇給。旣而居者寧。流者復。梗者熟。化者構。整整聿爲完邑。又以優異聞。更知青神。青神繁劇。悍胥黠吏。爲我民蠹。要官勢人。又掣肘焉。先生壹意撫字。力爲繩抑。民甚宜之。不便私者莫利焉。先生屢請謝事。當道慰留之。嘉靖甲申。以秩滿乞歸。抵家。明年乙酉夏。大旱。躬

率鄉人積精走禱三日大雨霑足衆比之東先生云倏遘疾以六月十二日告終享年六十有三嗚呼先生之德之才獨可師二庠牧三邑已乎小試焉爾而輒有聲士雲蚤立門牆見其博探約取而文學富氣和貌溫而充養粹志潔行修而操履端念厥祖事厥考而篤於孝愛厥弟而篤於友仁宗族交朋友禮鄉黨睦而信讓茲豈復有如先生者乎出而事君又爲良師牧如此其所謂有德於民歿而可祭於社者乎配楊氏先卒繼劉氏亦卒子二人楊出長範次節郡學生克承家學後先生三日卒可惜也已範以是年後十二月庚申奉葬於宏圭先塋其邑里世次如家禮刻於誌石某謹爲表以揭於先生之墓

楊宏山存稿

奉直大夫方茅朱公墓誌銘

李元陽

公諱光霽字克明號方茅先世灤人初戌籍應天既而移戍蒙化遂家焉父恆齋中成化丁未榜進士蒞仕留都廷評娶宴氏生公公幼穎敏不與羣兒戲父母異之及恆齋歷官爲貴州憲長適陽明王先生謫居龍場命公與二兄授學得聞良知之說自是知俗學可厭泠然有薄富貴輕勢利之想父命毋廢舉子業癸酉領雲貴鄉薦上南宮弗利嘉靖壬辰授重慶府通判自奉清約催科撫字犂然當於人心謠誦重道聲望大啓有僉事發銀買簪時公視府篆遂持銀入白曰通判自知讀書未知買造簪也僉事且怒且慚而寢撫臺善晉人府佐以下皆屬鞭笞獨公遇以禮退謂人曰朱通判非常吏也會有獄變人危之公捕獲無遺上

官相顧稱其能。凡蜀事有齟齬。積歲莫決者。皆檄公使治。公片言而決。以是難獄。案訟皆之重慶矣。丙申。遷知綿州。州多世家。私役州人。乃其常例。公至悉除之。一日。有稱尙書府家人。徵州夫栽田者。公曰。公田乎。私田乎。其人曰。雖私田。舊規也。公揭律令示之。其人不悟。而索愈固。公呼吏開獄中罪囚。使領曰。此數百。皆可爲栽田用矣。其人曰。恐不可。公曰。吾亦以爲不可。聞者哄然。其玩勢往往如此。及其爲政。直遂不阿。屢爲臺臣所嘉。三年。遷西安府同知。時有修復河套之役。百務填委。公酬應各有攸當。益爲監司所喜。因使公在邊。七年之內。七度防秋。曾無失事。織造貂璫。擅作威福。吏大小望顧跪拜。公獨不爲屈膝。貂璫銜之。偵伺其所爲。無隙可中。乃已。其治獄明允。多所平反。長安人擬之爲包孝肅。委署華州。朝邑。蒲城諸邑。所至有惠政。關中御史楊公爵。不輕許可。獨致書謝公。有益民生。勤勞旣倦。屢乞致仕。撫按諸司。惜其年勞。再三勉留。公不告而去。飄然長往。竟歸白下。旋復還蒙化。西安太守欲全其官。遣吏遙送給由文憑。公曰。豈有旣吐而復噉之。時邸報以陪點僉憲。公曰。卽爲僉憲。味止如此。竟不赴。時論高之。公爲人慷慨有大節。寡交游。惟同郡雷御史覺軒。永昌張禹山。含成都楊修撰升庵。大理趙中丞雪屏。及余數人。乃其所厚善也。里居歲久。渝綿人如任冶山。少參孫豐泉太守。皆致禮造廬。慕其舊德。巡撫劉公扁其門曰。耆英。歷官十餘年。歸囊蕭然。家徒壁立。予分田數十畝。始能卒歲。然日誦陶詩以自娛樂。不知貧之切骨。老之將至也。庚

午十月朔日。謂諸子曰。余了上天玄機。回造化真意。汝輩際此文明盛世。勉修忠孝大業。吾無憾矣。語訖而逝。公生於弘治壬子十二月十三日丑時。卒於隆慶庚午十月五日子時。葬以隆慶壬申正月壬午。配以李氏。荆南李龍州御史女也。大著內德。先逝。語具公所爲墓誌。今與公合葬云。先配某氏。生子五人。道衡。階。術。衍。皆補庠廩生。女幾人。壻某某。銘曰。

青萍不入內府而利已斷堅。騏驥不入天廐而力已致遠。嗚呼朱公。爵雖不至通顯。而更歷郡縣。其道已行。卒能脫屣富貴。甘貧以終。此豈淺丈夫所能窺哉。李中溪全集

陶別駕傳

唐堯官

公名庚。字子明。別號星予。居士。其先金陵人。四世祖澤。移戍滇。今籍昆明。公生時。母匡夢長庚星墮懷。遂命名。而父琮故篤厚長者。見公童牙時。聰慧絕倫。更莊嚴簡默。不作恆兒態。因曰。昌陶氏者。必此子也。年十三。督學瓊山。唐公試奇之。補郡博士弟子員。甫冠。卽與計偕。戊戌會試。同考試官吏部郎隆昌張公。業取中。偶遺之。公旣負才。而屢艱於一第。凡九上春官。始謁選。授武隆令。已復移倅承天。公之任楚蜀也。奉公守正。不媿姍取容。而惠政甚多。民無不戴之者。嘗曰。楊震暮夜辭金。及時苗留犢。前史稱之。不知此尋常事爾。惡足奇。觀此則足以覘公守矣。居郢未二年。幡然曰。夫仕以行志爾。今郡邑吏。往往制於上官。志惡得行。奈何。戀升斗粟。以自潤。遂乞骸歸。當是時。郢郡守北平何公。才名籍甚。雅重公。留之不得。因泣而

送之。嘆曰：鴻鵠已翔於寥廓，豈網羅之所得施哉！先是滇城諸縉紳，在世廟初最盛，然皆飭名節自愛，邇來稍稍變矣。自嚴太宰郭方伯而下，僅臺省郎數人，及他郡邑吏爾。然多犇謁諸當路，往來款結，以爲閭里榮。卽家亡恆產，糴而後爨，而薪且桂也。乃奢靡相沿，豐廚法醞，朝絃暮歌，鮮衣怒馬，以恣翫游。童稚綺績冠裳，捕博詼弈，滑稽揶揄相戲。此其澆風下注，不啻波流。公恥之，故足跡不入城闔。姓名不通公府，蓋三十年。謝絕賓客，而閉門埽軌自若也。構別業於西寺傍，課僕耕。時與二三知厚，棹滇池，登眺金馬碧雞諸山。於世空一切亡染。直指暨藩臬大夫，廉其高，間一造廬往候。而郡太守合浦鍾公、安陽易公，咸敦請鄉飲。大賓力辭之不得，乃始一再入城。其養高自重類如此。公僅一子舜臣，不謂俛得而愛之也。朝夕誨訓，亡論經史，導之槩獲，而戒謙訓儉。尤卷卷焉。蓋父而嚴師者也。舜臣當不負所教爾。齒旣載，自爲志其銘曰：生也如斯，死也如斯。榮枯萬億，造化亡私。三公九卿，何崇何卑。黃屋青冢，何喜何悲。人我我人，媿妍妍媿。昆侖旁礴，覆之載之。眞達者之言。古黔婁楊王孫，不是過矣。年七十八卒。所著有星予稿十卷，藏於家。

唐堯官曰：蓋晉有陶潛者，爲彭澤令，不肯爲五斗米折腰。遂賦歸去來以見志。迨宋有陶弘景，爲諸王侍讀，已乃掛冠神武門，表辭隱於華陽洞。公豈其苗裔邪？何出處之類兩公也。然潛溺於詩酒，公少飲，而詩興到始作，多憤世嫉俗之語。弘景癖於神仙，導引之術，而公關斥

二氏論誼一宗周孔總之各遂其高不相軒輊爾然古今而有三陶成鼎足之勢矣五龍山人全集

明奉政大夫袁次公墓表

唐堯官

唐堯官曰當嘉靖末里中才子則亟稱袁次公云方公翔奮時余適閩猶未之覲也泊歸而余私覘之益歎人言不誣矣嗣子昌國余壻也乃持其狀詣余曰先大人瘞骨玉案山祖阡窾銘久矣而墓尙未表翁其亡意乎因涕泣而爲之請按狀袁系出浙之桐廬因國初徙成瀆而籍晉寧祖讚仕爲文學掌故父體乾有隱操生丈夫子五公其次也名葵字尙忠夙慧讀書一目輒數行下而尤善他技藝年十四補郡博士弟子戊午督學德化余公試奇之稱其文生龍活虎不可繼縛已復歎曰若而天下才堪也何言瀆乎隨與計偕公畢試卽趣入南雍結納盡東南豪俊士因過桐廬淬學三年志決一第乃弗第復歸里中公雖負才顧道遠家故貧不能一第需又不能選需乙丑乞教職得諭蜀之峨眉以內艱復補元城旋擢任縣尹公在任精習吏事毫無緇點城南門塞焉亡謂令開之以通往來邑無辜以文致死者數十人公力辨其誣活之築張家泊以捍水患出田千頃招流氓佃焉多薦剡三年最受封誥遂晉夔州府丞決疑獄覈軍伍重修瞿唐鑠江閘蓋二千石爲南海郭公以詩鳴又柱史姚江任公謫爲理官相得甚歡一觴一詠彼唱此和宦踪殊暢亡何公病日治一年未愈遂

告疾歸。三年卒。年方四十六爾。公爲人美鬚眉。妍皙而身偉長。孝友得之天性。事嫡母如厥所生。與人交亡隱腸。獨沈酣載籍。而嗜歌詠。間以餘力攻六書六藝。及他諸技能。其他諸技。能人見之。禁口斂手。歎以爲弗及。之才之美。豈不天售通達哉。故里中人稱才子。必曰袁次公。袁次公云。滇俗偷。宦歸者豔滿載。而公所置宅。百金耳。又塔後田畝。未十公。故甘澹泊。然非食廉於官。能爾耶。憶公繹紋時。余在子舍。奉先朝議公命。締爲婚姻。亡論室邇。接眉宇。卽詩筒往來。日無間。迨今子居嶧首。能亡感乎。非不苦吟終日。而誰與唱和也。疑義誰與析。而舛誤者誰彈射也。飲酒誰與樂也。緬思今昔。焉得不悽悲永痛也。然昌國孤子耳。幹蠱能文。未竟之祥。當發之後人。而顧不得卽焱飛雲起。天道終冥冥已哉。蓋公歿十六年。而余爲之表其墓。俾世世有考焉。五龍山人全集

麗齋張公墓誌銘

王元翰

嗟乎。公之存也。予綦敬之。公之疾也。予再訊之。而公未能言矣。未幾以告終聞。辛酉秋。厥子謀葬公於北山之陽。以公狀索銘。予惟王氏張族世姻也。予又諗知公。誼曷可辭。公諱亮。字寅之。其先陝之鳳翔人。始祖諱恭。仕於寧。遂占籍焉。恭生益。益生瑤。瑤生海。官歷五省御史。以平閩寇鄧茂七之亂有功。擢貴州廉憲。海生時。時生鳳翥。鳳翥生裕仲。裕仲生公。公敦默寡言。鋒穎不露。年十六。補庠弟子員。每試必領批。丁卯食餼。鄉人咸器異之。期其雄飛接武。

如摘髭然。庚辰拔貢。督學荆公曰。斯豈苜蓿中人乎。初授蜀之疊溪教諭。端樹模範。嚴飭條規。大爲當事所重。委署茂州金堂。溫江篆務。公在溫江時。值羽檄旁午。庚癸頻呼。鄰郡倉皇。弗辦。閭閻騷擾。公獨辦糧糈。器具。廬舍。臚列于戎場中。兵民安堵。懽聲轟動。撫按巡行至。邑曰。張某之在廣文也。不猶鶴立雞羣乎。於是特疏云。博大端方之器。磊落超衆之才。內可備六官之儲。外可勝十城之寄。擢授隄令。隄蜀之巖疆也。夙稱刁悍難治。而公到則豎金聲玉振之風。培馬灘下埧之脈。接上以禮。御下以嚴。臨民以恩。孤獨者負屈必伸。豪強者有犯無貸。蓋公明察胥吏。不得伺其隙爲奸。而兩造爭訟。公片言折之。隄人憚公嚴。未始不服公明且廉也。適長郎孟宗卒於隄邸。遂無心於仕。拂袖還山。優游林泉者四十二年。日事修造橋梁。廣施經藥。建祠堂。修祖坊。賙貧乏。濟困弱。凡諸所承產業。價足之外。猶多餽贈。深得古人忠厚之遺。年六十。舉子心孔克家人。稱爲盛德所鍾焉。煙湖釣客曰。予所睹知交。家世熾盛。未有不由於源流之遠。家法之善者。張氏海公。西銘公。鳳翀公。爲當時御史名臣。如左藩法孔公。中書正道公。皆公之姪。一門四進士。三御史。洵爲滇之望族。豈偶然哉。晚癸丑還鄉。侍教於公。十有餘年。見公貴無舞車態。老無挾長態。富無矯張態。霜姿雪鬢。鶴髮鮐背。雖後生小子。接遇必恭。鄉飲舉賓二十一次。所謂年彌高而德彌邵者。其斯人之儔歟。享年八十有三。厥配黃孺人。乃貴州兵憲晉陽黃明良之女。良以女賢。不輕字。得公快甚。孺人事翁姑以謹。

聞家政分任撮其大綱然性沈靜好潔不喜麗飾常掃室靜居足未嘗輕越廉戶雖宗親媼戚燕會曾不一再往以故中表間罕接其面者可稱士女之行矣享年七十有八生子宗孟先卒次心孔豐碩謹飭大有父風爲之銘曰

儒所與立曰忠與孝移孝篤忠世食其報亦有孺人貞靜是樂嗣徽其門偕老心忉悼公星殞看子變豹荃艾玉埋光騰聲越有涓灋灋有峯谿礫刻石佳阡夫豈夢泡

寧州志

楊刺史傳

陳淳

公諱春震字起蟠其先江西臨川人也父一山公性沈靜多奇計連不得志於有司嘉靖間雲南鳳氏屢叛呂光洵受命撫滇且勦寇先是鳳繼祖結連會理姚安諸土司勢甚狂逞舊撫敖宗慶進討不效僉事張澤陷賊中洵募士能佐軍者一山公實仗劍從謀多祕密人無知者賊平洵酬之官一山公謝曰吾不爲功名來官何爲遂飄然去隆慶丁卯客楚雄有李公者奇其狀以女妻之卽公母太宜人也居無何楚士忌一山公才遷姚之武德衛庚午刺史公生隨移居武定刺史公五歲時端凝敏慧不同恆兒眉心有灸痕如一目光采映發郢客見而異之伺一山公他出負去一山公歸散金募士訪數年不獲萬曆癸未一山公遊武昌泊舟荆門入市閒步遇童子挾箎行兩相熟視兩相留連兩若有不解狀近見童子眉心灸痕輒淚下童子叩所以公語之故曰吾父也相持痛哭郢客懼不敢出刺史公泣言明發

耿耿未嘗置懷。日惟私涕。絕口不敢言被略事。且述郢客教以詩書。及珍愛意甚悉。一山公傾囊酬郢客。始攜公歸滇。是時見者聞者。莫不高一山公之不校。而服公之明哲保身。且負郢客教訓之義云。於時刺史公年十有四矣。讀書刻苦。文自成家。十六補郡庠。作諸生。十三年文行爲多士模楷。每試必第一。嘗習靜獅山大士閣。風起燈滅。俄見童子執燈復燃。視之。已失所在。至今有塑童子燃燈之謠。二十九以恩拔入太學。出陶少廣先生門。先生雅重公。萬曆庚子夏。促之曰。子才高。勿小就。歸應省試。若售五名後。吾不敢相天下士矣。是科果滇闈第三人。辛丑。赴銓部試。少廣勸勿小就如前。公曰。某非急功名。願父年高。冀一命。備祿養娛親爾。試第一。例得州缺。適一山公患疾。家報至。皇遽歸。侍湯藥。衣不解帶者累月。次年三月。一山公卒。祭葬遵家禮。不用浮屠。人咸服之。甲辰十月。授湖廣彝陵州知州。乙巳。從都門上任。停車鄭衛間。微行偵彝民利弊。王宦名撰者。張江陵姻家也。官吏部左侍郎。休沐家居。恃勢而橫。民罹其害者。傾家殞命。咸切齒而避其鋒。州守拱手奉命。稍拂。卽中以他事排去之。公廉得撰惡款二百餘條。并其黨與姓名。衙胥附撰者。悉識之。迺發檄之任。王親郊迎。厚餽遺。公辭受一規於禮。首謁宋守歐陽文忠公祠。出金亟爲修治外。一切俱不視。惟日偕紳士論文飲酒而已。二十餘日後。民詞積數百紙。吏莫能測。公因讀法旋署。召諸吏立堂下。集訟者環跪聽判。不終日。裁決已盡。各心服曰。三眼神君也。吏胥附王氏者。悉屏去。數與王

抗禮不爲下。王日偵公私欲巧中之。公剛直不染。王亦無如公何。復欲試公才。令人投一詞。捏事而繁其說。審質間又持一册爲僧乞募緣引。公揮筆聽訟如故。訟決而文亦成。又一尼持白紙跪堂下。問不應。援筆判曰。准還俗。免使僧敲月下門也。尼果叩頭去。王聞之亦嘆服焉。適江中詰得王私鹽若干船。公決意懲之。將鹽半貯庫。半犒捕役。草王氏狀。家人環跪泣諫。叱曰。爲天子命吏。敢自卹乎。且彼翼而食人。如畏權避勢。藏頭縮尾。是吏而奴也。吾豈效之。汝勿復言。下令曰。凡被王宦害者。許首告。不五日。控者數百人。公列撰諸不法狀。申詳撫按。捕一切惡黨。羈獄中。具揭科道各衙門。時撫按皆江陵舊人。欲寢其事。兵備王某力持不可。撫按不獲已。會疏奏聞。直指奉旨勘實。詔奪撰官。黜撰黨舉人二名。生員五名。發戍者七人。城旦者十人。彝民稱快。公慨然曰。民患旣除。仇讎莫解。明哲保身。固如是乎。卽告骸骨歸里。署中僅有書五箱。公曰。此亦彝陵物。去時封留之。百姓攀臥號泣。如失父母。旋將所遺書持送。至滇。數月後。撰抑鬱死。民爲謠曰。活我彝民。死彼王撰。好箇青天。胡止年半。至今稱道不衰。萬曆三十四年。公抵家。土人鄭舉。邱相魯。求通往來。公察二人有異志。絕之。告太守陳典。早爲備。典不能用。丁未。果陷府城。公先已攜家赴安寧。獲無恐。前太守劉懋武。王應期。胡其慥。皆大有德於武。公倡士民立祠。以彰其賢。公有弟二人。春霖。春霽。悉庶母金氏出。公友愛曲至。爲霽娶妻辛氏。戊申。霖卒。公悼甚。廢寢食。手爲文誌之。甲寅。霽又卒。遺一女。公撫愛

倍已出。事庶母金氏。關氏極敬謹。相繼卒。葬祭各如禮。戊申後不問外事。惟以崇獎後學爲己任。甲寅秋。評諸士文。語龔正曰。若能受言乎。正請命者再。公令同長子元祐課藝。獅山別業。教之曰。爲文須苦思刻求。一日一悟。愈悟愈奇。若今日寫昨日文字。是自暴棄也。天不借昨日殘霞敗雲以成今日人。可拾他人土羹塵飯以腴己身乎。乙卯。正登賢書。元祐誤中副車。童子楊玉瓚。故人子石振響失依。公給衣食。收入家塾。中訓誨。瓚響並入庠。食廩餼。啓迪多人。戊午。次子元升生。公建書室三楹於居室之側。擇鄉黨子弟俊者教之。器馬國正爲最。後易名乾。登崇禎癸酉榜。歷官至四川巡撫。以節著。人咸稱公有陶少廣之藻鑒。而馬中丞有公之風概焉。天啓壬戌。厭居城市。聞有勝地。輒命駕往。偶思元謀舊治莊田數畝。頗幽僻。兼欲探方山雷應之勝。十月抵官莊。疾作。家人請歸。笑曰。爾懼吾死非正寢乎。吾以天地爲正寢。復何歸。比長子元祐馳至。疾已革矣。呼謂曰。吾生平雖無大善。喜亦不愧科名。好撫幼弟。成吾未成之志。勉之。遂卒。崇禎間。王撰有姪名維章者。備兵雲南。章舊名某。卽所黜生員之一。乃改行力學。復應童子試得售。或以報復諷章。章曰。起蟠公未染吾邑一錢。吾敢以私仇公乎。倘非公。則吾止於紈袴耳。何由致此。置不問。尋擢滇方伯。土人楊應瑞以田土控揭。志構禍也。章亦不問。且語武定司李秦炫奎曰。起蟠公後人何如。李以長元祐副榜。次元升諸生對。章曰。書香有繼。斯文之幸。須青眼之奎。退而告人曰。楊公一無欲而感人若是。嗚呼。

孰謂廉吏不可爲哉。蓋公生平公正。服人心如此。余始奉命刺祿時。聞公氣節。數追嘆。獨恨未詳。久之。公孫澤先以公狀來。故得悉其顛末焉。夫武郡向爲夷區。自隆慶改土設流。迄今甫百二十年。而人文漸起。幾於家絃戶誦。諸父老莫不感公首倡文學。以詩書教子弟。以禮義率鄉邦之功。嗟乎。奕世猶將興起。公之爲人。蓋可思矣。寧僅廉吏云乎哉。

論曰。祿勸南距昆明不及二百里。爲烏蠻所踞。荒爲甌脫。自古不見聞人。自楊一山佐呂光洵幕府。決計滅鳳氏。改土歸流。衣冠之族乃來徙。一山亦宅於此。而春震遂以滇籍起家。官楚牧。著不畏強禦之聲。故此壤風氣之開。亦楊氏力也。志傳舊稱王撰爲張江陵姻家。恃勢而橫。按是時江陵之敗久矣。撰自官吏侍。何藉勢於江陵。而是時攻江陵者多。故因撰而附著之。明季習氣使然。未爲定讞也。王維章不報私怨。且感激當日切磋之力。此長者風哉。康

熙雲南通志

先君子小傳

何蔚文

先君子諱鳴鳳。號巢阿。滇榆浪穹人。登明萬曆乙卯鄉書第二。己未誤中副車。補蜀郫令。絕不以郵筒酒誤公。直指首薦。僅量移兩浙鹽判。判屬冷曹。王嬙不賄畫師。致有和番之行。先君子至。稱西湖漁隱。拈白傳未能拋卻杭州去。一半句留。是此湖之句。作半留亭。嘯詠其中。一時名流。無不推服。雲間陳眉公先生。則以爲山陰王季重使君比之。不過若嬰兒啼。隨轉

江北六安守。流寇十餘萬突至。六當楚豫衝。寇既至。其後往來攻打不一。先君子與士民信義素孚。防禦無遺力。而按君飛章入告。有六安閉門玩寇。憑城自安之語。朝廷不問。嗣後兵將絡繹。若雨若雲。支應心血欲枯。皆得滿志去。制府以其才。將題六安兵備。適丁內艱。地方控上臺留之。泣猶墨。衰視事。及得代。送者遮道哭。歸里閉戶課子而已。偶上雞足山。夢口吐金蟲。飛上中峯。遂示疾。終正寢。年五十一。在六時有冒楚宗者。名朱由極。敢與啓禎二廟御諱排行類。事經巡按。按君不敢問。下六安州。先君子謂卽係真宗。亦不宜遊蕩招搖。況屬冒詐。論如法。衆服膽識。又有某者。胥徒流也。紳士惡之。欲置諸死。先君子察其無死罪。只重懲。衆騰飛語。謂先君子受某千金賄。聞制府。先君子緘上制府云。某自幼讀聖賢書。受父師教。豈敢以千金博萬死。得白。其守正不阿類此。南臺馬之光。北詮徐致章。所特拔士也。自六來者。見入名宦。文蔚小子。永曆丁酉步武第二。劫灰累動。桂林枝盡。是黃柏樹。傷哉。偶代當事。改行述。備纂修錄。採恨無力。邀史筆。一及先人。小傳撮要。巨公長者。萬一見而憐焉。何稚玄

年譜附錄

滇南碑傳集卷五終

滇南碑傳集卷六

晉寧方樹梅臞仙纂輯

明校官

萬縣教諭嚴公墓誌銘

潘鏗

愚友嚴邦式甫。一日袒跣。捧其先世行狀。至自霍山。號泣再拜而言曰。範早承庭訓。叨弘治甲子雲貴鄉薦。卒業成均。遵先人治命。過常州故鄉。謁掃先壠。取道霍山。將歸養焉。值路道驛騷。梗弗能達。臥病逆旅。而訃音至矣。肝腸百裂。恨未及死。願惟懿德未彰。輒效唐李翱故事。哀次先世履歷言之詳。敢丐一言。以銘隧間之石。先生雅愛不肖。宜毋辭。按狀。公諱容。字宗仁。世爲常州之馬馱沙人。曾大父僦。值元季兵亂。荷爰歸我太祖。洪武初。從黔寧王下雲南。以功長十夫。戍宜良。太父可富。父鎮。咸早逝。大母高氏。母汪氏。皆年廿七而寡。各誓死堅守。鄉人號爲雙壁。公生於遺腹。兒時詢二母以父所在。知捧檄之浙。歿於江陰故居。遂呱呱而泣。稍長。鄉塾口授。輒成誦。叩質疑義。卽領解。塾師奇之曰。此千里駒也。讀小學至寡婦之子。非有見焉。弗與爲友。遂思所以亢宗。程其業。日引月長。值勢單家落。二母無以爲養。遂棄舉業。業廢舉以具甘旨。暇則劬書。攻詩綴文。犖犖有奇氣。里人爭延教子弟。閒嘗偕從弟庠生金。謁貴者。貴者獨禮金。公卽奮然肆力於學。無何補激江弟子員。連值二母憂。喪葬一

秉古禮。不治浮屠。鄉人化之。躬治兆域。畚土藝樹。目腫手龜。所親憐其骨立。咸勸其抑情就禮。公亦坐是嬰羸疾。留都大司馬童公軒。時以僉臬董學政。甚器重之。成化甲午。舉鄉薦。明年中乙榜。分教蜀之銅梁。遂浮淮徑江。歸江陰。將負其父之遺骸。合窆宜良焉。時南人畏隸尺籍。將遠戍。相戒噤不言蹤跡。墟墓竟未之得。於是建父龕於宦邸。告哀奠哭。如初喪儀。不華服。不宴會者三禩。郡邑人都憲李公實。郡守曾公昂。大參江公璞。爲心喪孝子文以表之。李以風節聞天下。少當其意者。而於公獨加禮焉。其爲人也。可知已。時學政久弛。師弟子惟材力相高下。公嚴法程。剖義利。日坐明倫堂。立諸生堂下。待問析疑。如絲纜髮櫛。暢而後止。復較所業高下。以驗勤惰。無或廢。乙巳。晉萬縣教諭。公教法一如銅梁。諸生臬臬訾訾。曳屣升堂者。一正以禮。久之。漸率化。嘗承使者檄。視邑事。羣胥易其儒者。顧公所因革。老吏所不及。有以利餌者。輒置諸法。則相戒曰。是腹中有鱗甲。不可犯也。其署教合州庠。內翰吉士鄒公智。方在門下。鄒素負才。未嘗不心醉。弘治戊申。藩臬大吏。檄公副纂憲廟實錄。及總裁全蜀志。公彪分彙次。黜浮崇雅。南川郡王寵次以詩。弟子登名甲科者。歲不乏人。官侍御。及於部。廷評者。往往以才顯。乙卯。秩滿。上章不待報。徑歸宜良。結廬溫泉近地。詠歌其間。有浴沂氣象。每角巾杖藜。探幽抉勝。與一二親知。命酒哦詩。以自娛樂。鄉飲盛典。縣大夫必首座。公貴游負笈來從者。亦接納不怠。公天性孝友。女兄適王處士而早寡。事之如母儀。教其甥壘。

亦魁薦書。事母以孝著。族人過宦邸者。必勉其毋墜先業。與人交盡忠。亦緩急有濟。同官李卒。公爲之賻斂。餼舟。其子以遺物謝。公惟將一硯。曰。見此如見吾李兄也。嘗見有翳桑之臥者。傾橐與之。因言於守臣。發委積以賑飢餒。民人德之。公爲文醇雅典實。詩亦不喜靡麗。所誦唐詩幾萬篇。凡抉奇剽怪之辭。一不挂口。工顏作楷書。每得必手錄。一時文章鉅公。如木齋謝公。西涯李公諸君子。皆有詩題其先世雙壁圖卷。二公文章妙天下。海內得其奇辭隻句。如寶璐璵璠。而皆不公吝焉。其爲人也。可知已。初。公每以迷失先墓爲恨。拳拳命範繼其志。期以必得。迨範歸常州。歲餘始廉得之。蓋其地已改隸靖江。族人盡徙如皋。將歸報。而公逝矣。□□高氏。繼室洪氏。閔氏。俱先公卒。子四人。長曰模。克家。出高氏。次卽範。中省試第一次表。中省試第四。俱出洪氏。次度。出側室邱氏。女四。長適石屏蘇淪。次適年家子霍山學生吳鳳儀。次適雲南都指揮方略。次適百戶樊俊。男孫四。光祖。光世。光代。光遠。女孫三。長適鄉人邱惠。餘在室。公生於宣德辛亥九月丙子。卒於正德庚午二月癸巳。享年八十。所著有葵庵錄。稿藏於家。憶昔先大夫長蜀藩時。累薦公才。謝中丞士元。每謂其詩可師法。走嘗兩過萬。而恨未公識也。嗚呼。太樸散而民俗漓。其知德者鮮矣。有一於此。猶將識之。況炳炳衆善者乎。是可銘已。銘曰。

堪輿之間。袞袞正氣。萃鍾於人。是曰良貴。氓之蚩蚩。中心如醉。乘堅策肥。誰錫爾類。彼美嚴

公其文炳蔚。溫溫宣和。侃侃剛毅。兩司教鐸。德浮於位。守道守官。捫心無愧。沂上風流。蘭亭趣味。溫泉之靈。爲公感涕。孫兮蘭玉。子兮騏驥。吁嗟先生。人中之瑞。我作誌銘。告諸嗣世。宜

良縣志

庠師逸翁王公墓表

楊慎

慎自正德丁卯入縣學。爲逸翁先生弟子員。其後先生再教蓬溪。三遷青神。慎叨一第。謝病家居。晉使時數數也。先生以子廷表貴。遂致仕。歸阿迷。未幾。慎得罪戍滇。先生聞之。且泣且喜。泣慎之懼患而喜其來覲也。未幾。先生以書召往。慎隨廷表憲使君。行至阿迷。拜先生於庭。顏色飲食。不減在吾邑時。則舉觴爲先生壽。蓋坐春風。又一月而歸安寧。約後當先生八表。再拜壽庭下。辛丑。訃聞。報先生以十二月二十四日逝矣。按狀。先生諱穎斌。字兼濟。先世有諱道者。自宋世居秀山。官於通海。嶧。子孫散居阿迷。寧州。廣西。曲靖。代傳儒業。元末。諱楞者。娶於阿迷李氏。遂爲阿迷人。楞善善。善生宣。宣生四子。其三卽公也。幼從名師學。嶄嶄出頭角。爲郡弟子員。場屋有聲。應丙科。薦爲太學生。癸亥。授四川新都學訓導。立師範。課後進。昕夕歲時如一日。先祖少師留耕公。極推重焉。提學嶺南蘇伯誠。安成劉文煥二公。皆甚許可。歷三邑庠師。皆在蜀。慎及弟職方郎惇。皆先生講下士也。子廷表。登甲戌進士。授台州府推官。先遣人橐百金遺之。曰。爾司劇邦。刑獄貨。非寶也。清如水碧。潔如霜露。與掛牀懸魚。

者伍。吾無慮矣。乙亥丁內艱歸。服闋。親友勸駕。先生曰。吾子已貴。仕心久灰。遂不赴都。壬午。表以推恩封承德郎。刑部河南司主事。配李氏。封安人。癸未。表以四川按察司僉事。致仕歸。壬辰。次子廷貴得選貢。彩服趨庭。先生日含飴弄孫。洽如也。歲五月望。爲先生初度日。每逢茲辰。親戚衣冠。合宴拜壽。凡十七度。以至考終。鄉人以爲榮。且難云。先生性純厚。孝友。爲儒官。罄俸紱衣。寄父母。無餘貲。二兄卒。獨力營葬。撫其遺孤。性與人無忤。接里閭。周恤貧乏。靡所恠。諸戚吉凶。雖昏夜必往。人有片善。贊揚不已。或不善。則掩護之。又面諭之。使改。人鑑其誠。亦無怨也。蜀中三學之士。遇滇人必問安否。有至泣者。其感人如此。子姓繁衍。孫一人。少已成學。先生及見之。若先生者。古之萬石君流非耶。得年七十有八。可謂遐齡。葬以卒之次年十二月初九日。葬在北山祖塋。門人前翰林院修撰。新都楊慎爲之表。楊升庵全集

建昌教授東山張公墓誌銘

李元陽

張氏世墓於劍川州之易隄坪。萬曆五年冬。始改卜於鶴川之三臺山。以葬東山公焉。公諱時宜。字仲衡。東山其號也。先世浙之寧波人。宣德間諱洪者。爲鶴慶節推。貧不能歸。占籍劍川之上和村。買田以業農。後有諱文信者。爲諸生。文信生勉。舉弘治戊午鄉試。授黔江令。德誼爲人所推。配楊孺人。有淑行。生五子。公其季也。公幼穎敏。善屬文。嘉靖壬辰。督學使選之。升入太學。時監丞博士閱其文。深嘉嘆羨。惜其不遇一解。及部試廷試。皆列名上等。得除四

川崇慶州學正。尋遷貴州程蕃府學正。公以師傅自重。以講學明道爲業。諸生有志率循者。盡革其舊習。而不能者亦勉強不敢後。督學道林蔣公。不輕許可。獨於公再三瞻睭。每向人言曰。他日入聖賢之域。必斯人也。在職數年。拳拳以古道教士。行冠禮以化椎髻。倡學田以贍貧士。人多從之。公爲人方正不阿。鄉飲司正。席與主並。太守欲抑之。公曰。此坐於教職何榮。著在令甲不移也。竟不能奪。監司諸公見其法古。初謂其迂。既而有成。皆翕然敬而愛之。撫臺培庵劉公。侍御方崖趙公。交章薦之於朝。會丁內艱去任。不果擢用。丙午補江西建昌教授。郡本文獻。士多馴雅。蒞職未幾。從學者日至。公益砥礪。勉修職業。多士觀感。爲之不變。數月之內。駸駸乎有鄒魯之風矣。郡人近溪羅公汝芳。倡明道學。與公周旋。日不足而繼之以夜。每同遊丹霞麻姑諸山。討論忘歸。嘯歌自得。望之悠然如神仙中人。每登講席。同寅咸聽。雖暑盛不敢揮扇。有不覺揮扇者。茫然自失。扇忽墜地。竟不敢拾。其爲僚友敬憚如此。父老隴眉皓首。不遠百里。執幣攜子孫欲一識面。其爲人景慕如此。一日自思家在萬里。年逾六秩。遂致其事而歸。諸生留程。無問老少。皆哭失聲。有追送五六百里者。其感人如此。比歸故山。舊宅蕩沒。乃擇里於鶴之孝廉村。深衣大帶。環堵蕭然。而一家男女。皆習白沙陳先生之歌。洋洋乎聲遍閭里。過者起敬。滇之有歌自公始。道逢鄉中老少。諭以孝弟忠信。俗爲之化。有不然者。其父兄必訴於公。公召而論之。其人慚服。有誤犯者。悔曰。切莫聞於張先生。夷

民爲盜。公挺身往諭之。盜臥弓於地。稽首謝而去。於戲君子哉。余與公山齋同宿。園館同居。善則相勉。過則相規。今春得公書。欲來相訪。余方懸榻以待。久而不至。無何。公訃至矣。嗚呼痛哉。其子元吉。昨歲中鄉試。念親老不赴禮闈。今得事屬纊。可謂孝思不匱矣。公以弘治某年月日生。萬曆丁丑五月二十八日卒。享年七十有六。所著有灌園子。東山語錄。東山詩草。詩教等集。行於世。配某氏。子男一人。卽元吉。女二人。長適楊鳳儀。次適吳自哦。皆庠生也。是歲十二月八日歸窆。前翰林庶吉士蒼洱中溪李元陽爲之銘。銘曰。

蔚彼高岡。維郡之紀。三臺嘉名。傳自古史。疇能當之。藏此君子。好德敦義。惟道是履。官卑庠校。名芬蘭芷。有儀如山。有文如綺。寧馨有兒。繼公而起。天與斯邱。君子樂只。我銘其阡。百禩之軌。李中溪全集

知我府君行述

王錫袞

吾家世爲陝之華陰人。始祖仲寬。以良家子從潁川侯克滇功。授右衛冠帶總旗。屯田祿豐。子孫遂家焉。幾傳至高祖用常公。恢復舊業而族愈滋。先大父柏樓公。纘承厥志。益拓前修。以嘉靖丙寅歲二月二十二日生先君。先君諱勸士。字宏舉。號知我。聰穎天植。過目成誦。猶嗜學甘貧。青燈魚目。危坐一小樓。達旦不休。故未壯而髮鬢皤然。早年遊泮。負笈百里外。從葆案朱先生遊。歷試滇闈不遇。遂傳易里中。所著有經書解。易學箕傳。天外奇集。養儉手抄。並

哀次覽翠樓集八冊。覽翠者。先大父柏樓公所作也。公煙霞之餘。不忘水木。選勝建祠。以永孝思。祠之後。仍爲樓。以眺望吟詠。此集其合而筆之者。先君弟兄凡五人。先君行四。式相敬好。篤於古誼。以娛先祖。先祖眞率坦夷。喜怒不介於色。先君奉之必得其歡心。以故先祖妣張孺人年八十時。常撫不孝孤曰。爾父自束髮來。只知讀書一路。行坐整如見博戲者。足爲卻。逢婦女面若赭然。爾祖愛之。從來不曾恚視一目。則家君之守身。蓋天性然矣。持論侃侃不阿。接物平易。中具饒嚴毅。鄉人士愛之畏之。往萬曆戊申。逆鳳之變。敝邑彈丸。煨燼靡遺。四圍盜起。都門鄒南皋先生。亦從田間起。首謁之。相與扼腕時艱。所談救時之務。有急著當家。澄清武源。攻守戰具。款虜種種諸論。南皋亦延款者久之。而先君不再往見也。及瓜。不孝孤偶博一第。改館職。鄉親友咸勸止之。先君曰。官無崇卑。行義一也。奈何以兒一第遽止。遂俛就劍川訓。終以萬里遊子。天涯落寞。戀不忍別。雖遘病而枕中書猶不釋手。於十月初五日卯時。竟見背矣。嗚呼痛哉痛哉。先君元配楊氏。卽不孝母。乃邑廩生楊有恆女。生子三。長不孝錫袞。娶儒官潘廕女。次錫玉。尙幼。聘易門縣王可立女。錫鉞。聘廩生宋學祁女。女二。長適廣通縣木爲楠。男木起鳳。次適湯用中。男湯至惠。俱儒業。不孝生女二。長許聘廩生束玉。男束世鑑。次尙未字。先君之來爲不孝來。先君之留亦爲不孝留。坐致棲遲帝鄉。一夕千古。許大願力。毫髮未償。則不孝孤固天地間一大罪人也。時奉素輻返故丘。卜葬於祖塋西山。

之麓。聖恩浩蕩。僅撮遺行二三。乞名公一言。以闡幽光。以徵先德。錫袞等死且不朽。寓京都承恩寺。不孝錫袞泣血頓首謹狀。王氏族譜

明佐雜

彭水主簿樂山吳君墓誌銘

楊慎

君諱欽。字允恭。姓吳氏。上世爲常州無錫人。洪武年成於滇雲。卜築昆陽州以居焉。君少業舉子業。以通四書。選入爲郡文學弟子員。有聲場屋。文通命塞。久之方就兩科之薦。中廷試爲國子生。未幾。時念親老。引例歸養。所天促之就仕。乃治裝北從銓選。主簿成都之溫江。未踰年以父喪去。溫服闋。補順慶之西充。又一歲以母喪服闋。補重慶之彭水。三仕皆在蜀云。君齡年未衰退時。忽引鏡自歎曰。仕無小大。歸咸宜早。吾自號山山。不負吾。吾負山矣。申請者再三。乃援例優進一級。爲迪功郎。榮其歸焉。且復其家無與庸調。鄉飲酒及澤宮射。延爲上賓。鄉人以爲美談。乃嘉靖乙未。以疾終於家。六月十九日也。得年六十有五。君娶張氏。生子男曰三省。嗣儒業爲州學生。卜葬於州城北進聖城山之岡。維時擇日於丁酉冬十有二月十五日。歸君於窀穸焉。三省介王天敘以銘來請。據狀。敘而銘之曰。

昆維漢澤。鍾美絕港。移吳文獻。用質演講。三仕蜀邑。績旣領項。翩其歸與。攸樂營構。潤及奕葉。遺光有蚌。篆銘幽宮。萬里無懷。楊升庵全集

迪功郎襄陽丞伍公墓誌銘

王廷表

公諱時暘。字東升。號泉厓。先世官臨安路。因家阿迷。傳二世至均。生宗。宗生景文。景文生壽永。娶趙氏。生子六。公爲次。弘治八年。充郡庠弟子。正德十年。太學卒業。嘉靖十六年。除湖廣襄陽丞。襄陽通衢事夥。公盡瘁無倦。富窟大訟。惟直之。無所取。內艱歸。遂不仕。公性謙忍。與衆無忤。莫不愛之。事父母孝。處兄弟無間言。伍氏鉅族。咸率教。郡謂之良眉。歸家朴素。或笑無畜。公曰。天下財可畜乎。古今以畜財敗者多矣。吾有先世舊業。守之遺子孫耳。衆服。是年七月初一日病卒。哭者如市。公娶普安知州楊憲女。生子二。長晉。庠廩生。次典。女一。嫁庠生楊明。孫男二。公生于成化二十一年九月二十六日。享年六十有四。晉典營新墓于北隴。卜來歲二月初九日葬。持狀請誌。表與公聯戚。締處愜洽。一旦失之。每晤於夢寐。誌之寧不悵悵耶。復銘曰。

不詭而衷。癯仕以標。墓門風雨。印續昭昭。

桃川剩稿

明故掾史董公墓表

楊士雲

太和有鉅姓曰董氏。世居弘圭鄉之市戶里。始祖諱成者。蒙氏時爲布燮。入朝於唐。賜賞而還。傳至諱晟。諱慶者。段氏時相繼爲布燮。按唐書南詔傳。布燮謂之清平官。所以決國事。輕重。猶唐言宰相也。慶生諱旻。元末爲鶴慶路知事。旻生諱惠。國初以武功爲太和所總旗。惠

生諱光諱長某爲今掾史公之大父也。杜氏趙氏爲大母母也。掾史公諱勉字安道少通書史長精於律應辟爲掾爲人氣溫貌和志容敦慤歷諸司幾三十年以文墨稱無纖毫過失上下咸重之晚有高致拂衣歸田里與親舊朋好優遊桑梓間得幽人之貞焉鄉評尤重之。予先君雅與公厚恆曰吾與安道壯同遊於外老比居爲鄰其溫煦如閨中人吾所愛敬昔人有如飲醇酒不覺自醉者其安道之儔乎予嘗識之且獲奉公之杖屨迄今慕之猶可想見吉人長者氣象屈指耆舊中如公可多得哉子仁克家亦以儒吏顯仕至表溪巡檢爲一時當路諸公倚任茲請老杜門養高有公之風重念族類繁碩譜系失傳乃遍錄墓之碑表銘誌家之狀集自始布燮逮今凡若干世爲董氏族譜且質於予予嘉其兼得歐蘇譜法竊嘆古有閭乘近代士族往往以譜爲議三世不修君子比其罪於不孝況吾鄉有譜尤爲落落有之自今日始也巡檢君亦可謂孝矣掾史公之德不於是益有徵哉公配楊氏慈淑柔靜克修陰教子男四人冢子卽仁次義次禮次智冢婦楊氏次趙氏次陳氏次楊氏冢孫大原次大策次某某次某某孫某某次某某公生於永樂甲寅九月四日正德壬申五月二十一日卒壽七十有九配生於永樂丙辰七月八日正德辛未正月二十一日卒壽七十有七合葬於弘圭山麓之新塋云是爲表

楊宏山存稿

明武臣

滇始祖景東衛百戶程廣公傳

程含章

程公諱廣。泗州人。建寧衛所鎮撫程公諱興之子。隨父任。嫻習弓馬。明耕戰之務。都指揮考列一等。洪武十一年八月。試懷遠百戶。稱職。明年四月。奉文實授百戶。又明年。以父病。令廣替職。仍授懷遠衛百戶。流官職事。丁父憂。仍供前職。二十三年。設景東衛。公奉調入滇。先是。景東自唐宋以來。皆屬夷地。元時雖入版圖。附威楚郡。不設流官。洪武初。西平侯沐英討平迤西寇亂。土知府阿陶俄赴軍門叩謁。獻印綬。令復職。十八年。平緬宣慰思倫發寇景東。沐英破其象陣。敗走之。二十年。思倫發復寇景東。阿陶俄與戰。敗績。奔白崖。告急。沐英復討平之。上其事。請設衛兵爲久安計。詔以神策衛兵往鎮其地。時我祖已調神策衛百戶。故在籍中。雲南去神策最遠。景東尤險惡。人皆憚行。或勸以疾辭。公曰。是何言哉。吾聞食人之食者。死人之事。吾雖小官。世食君祿。雖往而必死。死且不辭。況未必死乎。丈夫不能立功報主。奈何託疾以欺君哉。遂拜祠祭墓以行。嗚呼賢矣哉。人情莫不貪生惡死。戀井鄉。重妻子。一旦邊書告急。遠戍蠻荒。妻孥哀號於前。兄弟嗟怨於後。雖在士夫家。尙多逡巡畏縮。而況於介冑之士乎。於是斷指跛足。聾耳矇目。以避點簽者。此白香山詩所以有折臂翁之作也。國家歲費金錢以養之。月糜廩粟以活之。乃臨危輒避。詭脫名籍。亦安用此官兵爲耶。我祖不肯辭疾。可謂得事君之忠。而明於大義矣。於是隨同指揮及同知等官。領兵入滇。冬十月。至景

東阿陶讓宅爲城。讓田爲屯。遂設景東衛。我祖奉派左千戶所。任百戶事。時方草昧。堡舍荒涼。煙霧晝冥。虎豹豺狼交跡於道。軍士不服水土。瘴癘大作。死亡相屬。軍中嗟怨。思劫庫銀以逃。我祖曉以禍福。合方藥以療疾。方輒效。教軍士慎飲食。毋臥涼地。飢寒者恤之。人心乃安。遂佐指揮使開渠築堡。謹守關隘。分給軍士牛種器具。且耕且守。初到時。斗米三百錢。及三年。倉有餘粟。米易錢三十。地方以寧。三十年二月。以老病辭。子紀嗣。是爲始遷入景之祖。
月川未是稿

李將軍傳

蔣宗道

余門人李子恆春。以其父先將軍行狀。再拜乞余爲傳。余言固何足爲將軍重。但將軍與余有通家好。余固稔知將軍。義無容辭。乃爲立傳。將軍諱玉素。字昆源。昆明人。刑曹郎希雍公之曾孫。大足尹三山公之季子。幼習制舉義。貌偉而身長。有智略。善騎射。好窺陰陽。壬遁之書。父師呵之乃止。年十二。應童子試。郡縣輒居前茅。學使者某公見其屬文敏捷。遂列富民邑諸生。居亡何。喪父。家窘甚。時有姊夫張公華山者。陞越衢州府判。欲赴任。邀將軍同往。將軍素慕越山水人文之名勝。慨然從焉。抵越。越之嘉興孫公陞。偶見將軍題詠。大喜。因以己曾孫女妻之。年踰四十。始歸滇。將軍以久遊黜學。遂不屑復事章句。乃改業孫吳。應萬曆己酉壬子乙卯武試。三舉於鄉。旋登丙辰武會試。初授滇巡撫閔公洪學贊畫。值黔土酋稱叛。

滇兵援黔。將軍同參將袁善由亦資孔。普安進襲土官營。出奇設伏。多出將軍謀。斬首八十餘級。擒賊首段二。擢將軍本標中軍守備。又屢以才能稱。遷喬佃遊擊。駐紮安豐營。先是易門。祿豐。安寧。三泊。諸郡賊。跳梁劫掠無休日。將軍至是勦撫兼行。而數郡賴以安堵。時年已七十。復陞山海關副總兵。將軍嘆曰。方今國事洶洶。馬革裹尸。吾志也。其如年力昏耄。虛糜朝廷爵祿。何。遂以老致仕。年七十三卒於家。閔公洪學聞之。哭甚哀。且厚致賻焉。

論曰。余觀將軍之生平。宜其爲詩歌古文。一切論說。當奔放激烈。然余常讀將軍宜竹居看劍樓二集。而溫厚和平之氣。溢於毫楮。嗚呼。後漢諸葛君用兵如神。而當世始許以名士。知此意。庶可以論將軍歟。

雲南府志

胡一青傳

王夫之

胡一青。雲南臨安人。趙印選其中表兄弟也。一青本名一清。隆武中。因避大清字。改名一青。一青短小輕捷。尤長於馬槊。腋挾二槊。飛擲三十步外。中重鎧皆洞中。追及奪槊。迭擲迭奪。每馳陷陣。輒手殪數十人。以爲常。所乘馬。號沙兔子。高不滿五尺。騰躡輒度萬馬前。而印選故爲里魁。雄長諸土漢。弘光元年。御史陳盡巡按雲南。事竣。復命。因言雲南故有貯帑銀二十萬兩。爲不虞貲。請發此金。募滇兵入衛。勅如其請。遣之。盡大名人。以崇禎辛未進士。歷官臺端。性簡傲。戎事非其所長。因臨安推官朱壽銖。展轉召募。閱歲餘。乃募兵五六千人。土漢

各半。多驍勇士。馬仗皆精好。以胡紹虞爲總統。印選副之。而一青爲偏裨。未爲蓋所知。蓋聞南都陷。意趨起。留連秦楚間。隆武二年。更奉勅。促赴閩。蓋乃率兵出湖南。亦躊躇無趨闕意。何騰蛟欲留之。協守長沙。蓋傲岸。與騰蛟意異。東去過吉安。萬元吉留之。守吉。居數月。蓋方遣印選率一青屯安福。劉良佐。高進庫。以清兵數萬圍吉安。元吉請蓋出兵擊之。紹虞登堞。睨敵。恆懼墜地。一青聞吉安被圍。自安福率輕騎馳歸。蹂良佐老營。斬殺披靡。敵半殲。轉戰至城下。圍城兵忽潰走。城中猶不知。俄一青躍馬追擊大呼。城中出兵夾擊。追奔十餘里。吉安圍解。紹虞媿詘。讓一青爲總統。一青以印選齒長。聲望較重。以讓印選。印選肥鈍。實不能戰。倚一青爲重。王永祚者。少于一青。慄悍亞之一青。尤與永祚相得。而營務則推印選。印選顧睚眦自尊。一青安之。以是滇營稱和輯。臨敵無貳心。是年冬。清兵大舉攻吉安。元吉蓋先以言語相觸忤。蓋引兵退南安。吉贛陷。元吉死之。蓋零落失意。率諸軍居郴韶間。鬱悒死。印選一青。無所聽命。欲解甲歸滇。楚粵諸將欲併得之。轉戰至永州。顧梗阻孤危。乃請命于何騰蛟。騰蛟大喜。收恤之。爲奏授印選一青各副總兵。屯永州待調。已而湖南陷。上居武岡。騰蛟入見。印選一青亦率軍至。劉承允欲致爲己屬。誘脅備至。一青印選治兵屯武岡郊。自保。睥睨承允肘腋間。承允不敢誰何焉。勅召入見。賜號御滇營。皆授總兵官。都督同知。挂將軍印。承允怨騰蛟。不遣出師。騰蛟奉勅不能行。印選一青乃拔營起護騰蛟出。承允發兵追

之承允兵至。一青下馬揖追兵曰：「吾兄弟荷劉公寵遇，豈忍相背？特督相奉詔出圖恢復，吾義當從。」願公等返報劉公。他日當有以相報。若必欲邀我者，則今日與公等併命於此。」爾遂上馬挾槊，火礮齊發。軍以次行。一青緩轡殿，追軍莫敢前。遂繇間道達義寧。桂林潰，瞿式耜率焦璉入城嬰守。請援於騰蛟。騰蛟以印選一青至，大敗清兵於北關。追及之，又敗之於甘棠渡。皆一青陷陣，手馘數百人。追至大榕江，兩軍相接。清將線國安與一青交馬。國安舉刀斫一青。一青從脅下持國安，國安憊，拔刀將斫，會救至。國安乃脫走。會大風塵蔽天，清兵驚潰。一青盡奪其馬仗幕帟，輕騎追躡之。清兵走楚。一青遂會印選璉攻全州。大戰於飛鸞橋。一青躍馬飛槊，敵盡披靡。大敗之。衆幾殲，遂復全州。進圍永州。余世忠出兵拒戰。一青屢大敗之。軍中獲諜者得密書，知清將魏自寶慶來救。一青自帥兵伏于文明鋪待之。寇至夜安營，竟猝起攻之，斬獲無算。縱所俘入城告敗。世忠潰圍走。復永州。一青遂攻衡州。下之。騰蛟列上其功。封印選新興侯。一青興寧伯。騰蛟下湘潭，留一青守衡州。騰蛟敗沒。一青請援於印選。印選坐桂林，不爲出。分遣偏將劉祁陽爲虛聲應援。一青與王永祚合薄清兵於衡山。敗之。已而清兵大至，戰青草橋，不利。乃退入嚴關。一青所將滇中驍卒，轉戰三年，死傷過半。益招楚粵間新兵萬餘人。印選所募近二萬人。永祚亦五千人。蒲纓亦滇將也。與合營亦二三千人。然脆弱徒爲冗食，類不能戰。威亦挫矣。印選以總統論功，封開國公。益驕蹇，廷議不

平式耜乃奏晉一青爵衛國公。封永祚寧遠伯。一青樸率無威儀。言多造次。而恭謹不驕。在軍中能茹荼苦。坐臥草泥。食糗飲濁水。自如也。印選開帥府於桂林。擁歌舞自奉。恆踞嫚待。一青一青亦弗較。每出師。一青輒先驅。印選乃遣部將尾之。桂林地褊賦薄。饟餼不給。式耜措給其軍。印選取贏自給。次乃及一青。永祚一青比歲扼全永。不獲已野掠而食。永曆四年夏。式耜催諸軍出楚。一青獨與永祚及馬養麟圍永州。將拔之。會孔有德復南。清兵大至。一青乃全軍歸。壘嚴關。與有德前部相持不下者五月。野無所掠。兵皆餒。采藜以食。一青馳歸。泣告之。印選弗應。會于元煜以其女許配永祚。永祚說一青戴元煜爲督師。元煜遂以滇營戴己自陳。晉樞貳督楚師。印選知之。乃盡元煜。令改妻己。元煜叛永祚盟。以適印選。永祚怒。欲刺殺印選。一青勸止之。而永祚稱病臥。桂林不出。一青孤軍與敵相拒。印選方盛飾。迎元煜女。置疆場不問。一青恚甚。欲棄桂去。式耜強挽之。十一月。孔有德攻榕江柵壘。一青方拒戰間。印選遽趣諸軍護其妻走柳州。一青驚遽。乃棄壘去。桂林陷。永祚遂降。印選既老悖狂惑。部曲解體。失衆以死。而一青失永祚。又屢挫衄。亦不自振。退左江土司中。孫可望僭逼猜殺。一青不欲爲之下。李定國軍南寧。將迎上。攻雲南。請一青爲嚮導。一青爲導。自泗城州進師。然不肯與定國偕。屯聚既久。衆益散。爲清將全節所困。乃披剃爲僧。求與其徒種山而食。居數年。線國安以榕江之怨。遣兵就其山攻之。遂見殺。王永祚既降。復爲僧逸去。見擒。

孔有德縊殺之。永曆實錄

附倪蛻滇小記一則

一清曲靖越州人。殘明時爲將。封越國公。授金印。一清故農家子。當皇朝定鼎。大兵臨滇。遂散衆棄官。歸農于越。率其家屬。耕田而食。怡怡如也。吳逆反。遣僞員召之。一清佯作風顛狀。言笑歌哭。若憑妖祟。已抱豬而臥。鼾聲若雷。忽起而走。不知所如。詢之村人。咸云病兩年矣。于是僞員去。一清終不污僞命。爲農如故。康熙二十六年。其家奴赴總督范公承勳。密首一清有金印敕書。將謀不軌。范公素聞前後事。乃執拘其奴。而呼一清至。時一清老矣。囚首跣足。長跪階下。范公曰。老農自首汝密藏敕印者。果然乎。一清曰。誠有之。遂出諸懷中。金章一。大小方寸許。勅書一道。列永曆年。皆初封越國公時所給也。乃詰之曰。此二物歷今三十餘年。而汝猶守之弗失。何耶。一清泫然出泣曰。故主之恩未報。故主之賜難忘。是以佩帶三十年。未嘗去身者。意欲殉死同埋。以見故主于地下耳。非有他也。范曰。懷璧其罪。獨不聞乎。留之無以間。執讒慝者之口。遂令毀之。一清叩首而泣曰。老百姓犬馬戀舊主之心如此。死生悉惟公命。范公令起立。深慰遣歸。行令中軍。杖其奴至死去。又數年。一清乃死。

案一清曲靖楚州人。王夫之永曆實錄列傳云。臨安人。又去一清披剃爲僧。與其徒種

山而食。線國安以榕江之怨。遣兵就其山攻之。見殺。殆皆傳聞之訛。倪蛻所記封越國公。及藏敕印事。足補王傳之闕。

張先壁傳

王夫之

張先壁。雲南臨安人。應募隨總督尙書傅宗龍軍前自效。稍積功。次爲援勦參將。隨楚撫宋一鶴守顯陵。加欽依副總兵。承天陷。南奔武昌。張獻忠破武昌。先壁走岳州。王聚奎巡撫湖南。聚援勦兵十三營。守長沙。先壁其一也。先壁所部近三千人。號滇奇營。頗習戰。與張獻忠戰於羅塘河。先壁陷陣。有斬獲。賊稍退。蜀將孔全斌遽縱火潰逃。先壁乃走至寶慶。入武岡。依劉承允。承允待先壁不以禮。已而李乾德檄同承允攻復寶慶。先壁軍先登。承允尤忌之。乾德撫偏沅。承允其屬也。獎承允抑先壁已甚。先壁無所容。怨乾德。率其兵東下。屯茶陵。乾德無以撫輯之。先壁亦因不聽命。自募兵就食民間。大爲民擾。何騰蛟開府長沙。調先壁。先壁自爲乾德所不恤。餉餽絕。掠野而食者兩年矣。騰蛟餉之。先壁遂依騰蛟。騰蛟議出師武漢。調諸將。先壁與承允皆集長沙。先壁以宿隙。因事與承允競。騰蛟右先壁。承允怒。歸武岡。先壁懼承允之終圖己。益召募兵。踰五六萬。多爲營號。以抗承允。然大要皆竄農叛僕。固不習戰。隆武二年。思文皇帝欲出楚。騰蛟分遣先壁。及郝永忠爲左右部。率師迎駕。令先壁自攸縣出永新。與永忠會於贛。題授總兵官都督同知。然騰蛟實不欲先壁行。遂次攸縣不進。

永曆元年。長沙潰陷。先璧西走寶慶。劉承允疑其圖己。遣兵禦之。先璧畏清兵追。不敢與承允較。趨新化。走激浦。入沅。上疏自理。言臣無讎承允心。且不敢犯輦轂。方思與承允洗心灑血。扈陛下於艱危。而承允猜伎狠毒。迫臣於險。臣心無以自白。請與承允面質。承允執其使。磔殺之。馬吉翔阿承允意。矯旨切責先璧。先璧繇是益驕恚。屯黔楚間。偃蹇不通奏謁。武岡陷。承允降。上乃降勅聯絡先璧。封南寧侯。湖南復。先璧望騰蛟之招致己。而騰蛟方爲湖北潰兵所勦。不及調用。騰蛟沒。先璧益無所望。朝廷無以收之。先璧擁衆據鎮沅。奪民田以耕。日與苗夷相讎殺。日益疲。孫可望出貴州。矯勅徵先璧。先璧遂附於可望。永曆六年。隨劉文秀出蜀。攻保寧。結筏爲橋。濟師。令先璧斷後。先璧弟先軫。患其兵之退怯。斬筏橋。而不以告。清援兵至。文秀糧盡退師。將據水南結壘。橋已斷。兵洶懼。清兵乘之。大敗。溺死者無算。文秀械先璧歸。見可望。可望杖殺之。永曆實錄

滇南碑傳集卷七

晉寧方樹梅臞仙纂輯

明忠義

傅忠壯公傳

趙元祚

傅宗龍。昆明人。號括蒼。萬曆庚戌進士。任巴縣。負能名。擢侍御。巡鹽於浙。卻羨金四萬兩。光宗服紅丸晏駕。抗疏請誅崔文昇。出按貴州。監貴撫王三善軍。三善爲賊黨。陳其愚所害。計擒誅之。以征安逆功。晉太僕寺卿。旣而撫畿。條奏興革。悉協時宜。旋陞薊遼總督。轉戶部侍郎。言事忤旨。革職。及流寇殘蜀。蜀撫王維章不能禦。起宗龍代之。秦寇由陽平白水再入蜀。宗龍率滇軍二千。與蜀帥羅尙文謀戰守。屢出奇破賊有功。以才望召入。繼楊嗣昌爲兵部尙書。嗣昌出督師。多所乞請。上命撥餉五十萬予之。宗龍以民窮財盡。指畫上前。上不悅。時洪承疇請用劉肇基爲團練總兵。高起潛又揭肇基不堪。將下部議。不卽覆。上以違旨抗藐。革職下獄。及李自成入洛陽。醢福王。復移兵攻汴。勢甚張。秦撫丁啓睿不敢擊。上素識宗龍忠誠可用。出之於獄。拜兵部侍郎。爲陝西總督。專辦自成。宗龍受命入關。與秦撫汪喬年謀所以平賊。諜報賊將入關。喬年率將士馳至商維。宗龍與之會。欲搜兵括餉。而關中旱蝗。閭左調發殫盡。無以應。僅賀人龍李國奇二將之卒隸焉。保督楊文岳率虎大威一軍與之會。

兩軍次新蔡。渡河趨項城。甫至龍口。遇賊。公身先率李國奇等擊退之。自成伏精銳林莽間。陽驅諸賊西渡。諜者報賊渡河趨汝寧矣。二督夜召諸將謀邀擊。師至孟莊。賊伏發。賀人龍之卒先奔。賊合股大至。虎大威及國奇陳監軍不能敵。俱奔沈邱。兩督僅以親軍與賊持。宗龍營西南。文岳營西北。迨夜文岳所部潰。張副將挾文岳馬上馳去。宗龍謂任監軍陳副將曰。宗龍當死久矣。今惟決命死戰。不能效他人捲甲走也。乃召裨校所將六千人。卽文岳置壁處。重穿塹。結壘拒守。密書招陳監軍李賀俱不應。受圍十日。兵糧盡。殺馬騾食。馬騾亦盡。夜身先突圍出。馬蹶。宗龍徒步。且戰且走。凡二日夜。未至項城八里。被執。賊擁之至項城。賺守門者。宗龍大呼之曰。我傅督也。不幸爲賊執。城上速用礮擊。我死耳。勿墮賊計。賊揮刀中腦後。大罵不絕。賊復斫左脅。抉目削鼻。死之。礮聲起。賊退。家人盧三負之入城。事聞。上悼惜之。贈宮保兵部尙書。賜祭葬。予世廕。諡忠烈。後避烈皇帝諡。改諡忠壯。滇南文略

傅宗龍傳

查繼佐

傅宗龍。字仲綸。籍昆明。或曰傅麗江之後。萬曆庚戌進士。知銅梁。移巴縣。擢御史。嘗論張弛。以爲張而不弛者。斂財之法是也。其病在野。弛而不張者。課職之法是也。其病在朝。何以弛之。遼餉旣未可蠲。宜劑量而輕重布之。計畝之說。不可執也。若夫捐俸停食。開例諸政。皆可罷也。其有借稅契以剝民。因加派而索耗。則重繩之。何以張之。當自輔臣始。票擬須協公論。

毋務兩可。蓋六科職掌不伸。六部之職業盡廢。凡夫事推諉而人玩愒者。朝廷必有以責成之。疏入。上不能用。詔大賞平苗功。宗龍以爲有勦苗之賞。必有失邊之罰。人始知勸懲不聽。又疏發內帑。蠲加派。收民心。固邊圉。汰冗兵。免征調。精訓練。數事皆關切時務。疾歸。天啓四年。起巡按貴州。監諸軍事。勦安酋之逆。殺賊間陳其愚。以徇黔人大悅。黔撫蔡復一請專勦宗龍進取。從之。遂上方略。申明戰地。戰日。以期全勝。破格進止。一聽大帥魯欽。入平垣。連戰皆捷。援普定。大破之。追奔至織金虎塢。斬首八千有奇。五年。魯欽以驕兵潰陸廣河。詔朱燮元代爲總督。而令宗龍久任。遂與復一發兵搜討。先後破巢一百餘。俘斬三千。賊魁阿秩天保等皆伏法。遂條列屯守之法。必使一粟不入水內。一賊不出水外。而屯之說有二。一則清理各衛所原田而屯之。一則割賊之故壤。以衛所之法屯之。倣祖制。舉所屯田。以授有功之人。世其業。且與世職。則戶口可實也。部議從之。六年。魯欽兵潰余官堡。宗龍遣兵攻河沙壩。獬鬼盡俘斬之。諸夷奪氣。繼遣張雲鵬等拒賊安邦彥于趙官堡。大小十餘戰。殺傷無算。加太僕少卿。力辭不許。以滅賊爲期。于是復大破諸苗寨。斬首千二百餘級。憂歸。崇禎三年。起原官。遷右僉都御史。巡撫順天。明年。大凌河被圍急。請號令與事權一。薊門可固。晉兵部右侍郎。總督薊遼。時山東巡撫楊嗣昌。關寧巡撫方一藻。皆欲款敵紓禍。宗龍謂不戰而款。款在敵也。以我徇款。款成且大辱國。以敵操款。款不成亦且大辱國。由是與二人異議。東師頗

以薊遼有備。專圖宣大邊。會山東有登萊逆弁之變。悉發關寧精卒應之。遼備頗單。東師遂襲破旅順東江。遼兵不能救。上下詔切責宗龍。時聞東師且大入。檄關外兵防薊。夷丁噪而叛去者千。以宗龍不能撫戢。有詔逮治。除名爲民。久之。秦流寇悉竄蜀。破郡邑以十數。卽家起宗龍故官。巡撫四川。甫抵蜀。而賊已飽掠。復遁還秦。前後斬首數百級。賊渠順天王等皆死。時總理熊文燦力主撫議。宗龍上書言賊不大創。不可撫也。且安所置之。國家度能更金錢數千萬飯賊乎。蒙旨切責。賊時不敢入蜀。而境內苗獠土寇。搜殲殆盡。召入爲兵部尙書。而文燦所撫劇賊張獻忠果叛。楊嗣昌自請督師出勦。會督臣洪承疇薦劉紹基爲總兵。宗龍以覆奏失寔。不稱旨。遂坐削籍去。十四年。諸道兵潰於襄陽。嗣昌自殺。復起兵部右侍郎兼右僉都御史。總督三邊。九月。宗龍以陝兵四萬討賊。次新蔡。與保督楊文岳師會。時總兵賀人龍李國奇將秦兵。虎大威將保定兵。並渡河趨項城。賊自成與羅汝才等。佯欲渡。趨汝寧。而伏兵待隘。宗龍文岳遽進陷伏。人龍懼。不戰。與大威北奔。國奇戰不勝。亦潰去。文岳夜入項城保。賊更番來攻。不利去。宗龍士死者二千餘人。賊重圍困之。十餘日。二師觀望不敢救。食盡。食馬。馬盡。以六千衆突圍出。賊追執之。項城外八里。以宗龍給項城門。宗龍望門指心遙曰。宗龍被執死耳。幸閉堅。賊怒。抽刃擊宗龍中腦而仆。起復厲聲罵賊。賊割其耳鼻。盡卒不忍加害。宗龍憤惋。負重創。絕食死。項人殮之。天吉寺哭祭之。事聞。詔復其尙書原官。初。

秦撫汪喬年送宗龍出關。曰：公行僕願率所部以應。涕泣訣。至是聞變。仰天歎曰：傅公殉國。討賊何人。自知餒肉猛虎。然不可不出。以慰中原之望。師次陝縣。聞襄城破。不進。觀變。論曰：仲綸知兵。得潁川家法。張弛二義。鑿鑿可用。搗安會諸苗。有殊績。總督薊遼。不從款議。卜熊總理之。受降必敗。如指掌。乃何以輕進。墮賊算。而不知所以善其後也。時李羅合。兵勢十倍。賀虎不前。誠廢令。而不知所以令。伊誰責哉。指心城門。張子明之烈矣。罪惟錄

傅忠壯公傳

失名

其在易曰：王臣蹇蹇。匪躬之故。其在傳曰：濟則君之靈也。不濟則以死繼之。其秦督傅宗龍之謂與。宗龍號括蒼。雲南昆明人。由進士初任巴縣。負能名。入爲御史。視浙江鹽政。卻羨金四萬兩。泰昌宴駕。抗疏請誅內侍崔文昇。以用藥之誤。再按貴州。監貴撫王善三軍。王被苗黨陳其愚所殺。力擒正法。以征安邦彥功。加太僕卿。繼而撫畿一年。總督薊遼二年。轉戶部侍郎。建言忤旨革職。十一年。流賊逼成都。起爲四川巡撫一年。尋加兵部侍郎。宗龍在行間久。諳練形勢。競以老將目之。十二年八月。以才望繼楊嗣昌爲兵部尙書。初見上。諄諄以民窮財盡爲言。上是之。宗龍指天畫地。言愈力。上不悅。十二月。洪撫承疇請用劉肇基爲團練總兵。總監高起潛又揭其恇怯。下部議。不卽覆。上怒其抗藐。責回話。以戲視封疆下獄。在獄閱兩載。十四年。寇患亟。宗龍年老矣。上素識其忠誠。且以夙負。用之。必盡死力。釋之出獄。以

兵部侍郎督陝兵討賊。令其專辦自成。卽秦軍在豫者。李國奇、賀人龍二將隸焉。又命保定總督楊文岳率總兵虎大威一軍與之合。九月初四日。次新蔡。縛浮橋渡河。趨項城。兩軍畢渡。走龍口。自成亦過河。將窺汝寧。適相值。覘官兵且至。伏精銳林莽間。陽驅諸賊西渡。謀者還報賊渡河趨汝寧矣。宗龍與文岳兩軍並進。次孟莊。諸將弛鞍解甲。散行村落間。求芻牧。伏兵猝起。人龍倉猝棄軍走。國奇不勢敵。與虎大威亦奔。兩督僅以標下親兵與賊相持。二更。保兵北隊走。有副將挾文岳上馬馳去。宗龍慷慨語其麾下曰。宗龍年老矣。今日陷賊中。當與諸軍併志決命。爲萬死一生計。不能效他人捲甲走也。乃招裨校李本實等。穿塹結壘。誓必死。自成見秦兵無救。於圍外穿兩壕困之。十一日。我兵糧盡。殺馬。十五日。馬騾亦盡。營中火器弓矢俱盡。十六日。二更。潛突賊營。潰圍出。師大潰。宗龍徒步。且戰且走。次日。未至項城八里。被執。賊詭稱傅家將。擁之趨項。至城下。賊呼啓門。宗龍大聲曰。此賊也。身是傅督師。不幸落賊手。城上速用礮擊。毋顧我墮狡計。賊揮刃中其腦而仆。復大罵。賊抉其兩目。劓鼻。礮聲起。賊棄之去。家人負入城。項人殮之。天吉寺祭而哭之。後贈宮保。諡忠壯。予世蔭。人龍逃歸陝西。密旨令孫傳庭斬之。

表忠傳

馬乾傳

馬乾。本昆明人。從楊春震學。因居祿勸。春震自彝牧歸。倡正學。教其里。士多從之。游而春震

檀萃

器其長子及乾最甚。名長子曰元祐。字以泗水。名乾曰國貞。字以洛水。學者並稱二水。元祐尋舉副貢生。而國貞顧屢蹶。乃易名乾。舉崇正癸酉鄉試。明年應春官不第。乃就銓。出知四川廣安州。十三年。張獻忠犯蜀。夔州告警。巡撫邵捷春以乾行太守事。守夔州。獻忠至。攻圍二十餘日。不能下。督師楊嗣昌軍至。賊解圍去。城獲全。敘功擢川東兵備僉事。在川東數年。屢踏賊。賊憚其能。不復窺川東。遂蹂躪於荆楚。將及吳越。然憚左良玉在。不敢東。仍決計復入川。七年春。陷夔州。涪萬進破重慶。前撫陳士奇死之。遂長驅犯成都。時龍文光以川北參政。晉新撫。聞命。由順慶馳赴成都。部署未定而城陷。文光亦死。賊遂據蜀王府。僭大號。肆荼毒矣。當是時。川東參將曾英。李占春。于大海。王祥。楊展。曹勛等。各起義兵討賊。以無所統。乃共推乾行巡撫事。於是擊走賊將劉廷舉。復重慶。乾因駐重慶。傳檄遠近。協力討賊。廷舉既敗歸。賊遣劉文秀等。率衆數萬來攻。乾固守重慶。曾英等援兵至。賊復敗還成都。王應熊者。奸相周延儒之黨也。性庸而狠。不知兵。獻忠陷四川。時朝議改應熊兵部尚書兼大學士。總督川湖雲貴軍務。專辦川寇。時川中諸郡皆沒。惟遵義未下。應熊乃入守之。然不慊於乾。明年。乃訐乾縱兵淫掠。命革職提問。然是時蜀地已大亂。詔命不至。而乾行巡撫事自如。已而獻忠敗死。賊黨四潰。諸將楊展等。各據州縣。不受應熊節制。曾英既復重慶。屢破賊。功本最。而王祥亦出師綦江。相犄角。祥才不及英。而應熊獨委任祥。舉動乖張。羣情解體。又明年十

月獻忠餘黨孫可望李定國南奔重慶。乾與英禦賊。英力戰死。乾大創賊。賊遂舍重慶。襲破遵義。應熊遁入永寧。既而我師追賊至重慶。乾戰敗而死。賊旋據滇。械乾家將盡殺之。其一賊曰馬巡。撫抗節拒我忠也。毋害其裔。賊曰若忘殲我軍。幾無遺類乎。一人復曰使其子在。蜀殺之何惜。今奈何以舊恨赤忠臣族。盡釋之。乾二子長襄。元謀庠生。隱於醫。次良。武定貢生。俱居昆明。康熙中武定守王清賢爲乾傳。不能詳實。但稱有來告者曰。乾初禦寇。屢建奇功。寇畏之如神。厥後寇黨益衆。勢益大。難支。敗回內江縣。城潰被執。百計誘降。罵不絕口。以死。又曰。乾被執不屈。時寇挾之。抵成都城下。以亂固守心。至城隅。厲聲語守將曰。馬乾得死所矣。封疆大臣。不幸被執。有死無二。公等堅守。寇將自亂。今檢明史。列乾於忠義傳。按其事實。則鄉里之言繆甚。故採明史及當時同事諸人傳以正之。

論曰。馬中丞乾。保全川東且數年。使當時以之代陳士奇。或者成都不至失守。然此亦數也。楊春震字乾曰洛水。字元祐曰泗水。而元祐亦以學正死官。是知理學氣節。表著一時。其得力於父師講厲者耶。農部瑣錄

馬乾列傳

溫睿臨

馬乾。號樂水。昆明人。崇禎癸酉舉於鄉。爲四川廣安知州。廉平。舉卓異。巡撫邵捷春令攝夔州府事。獻忠入蜀。攻圍三十餘日。乾固守不下。督師楊嗣昌遣兵援之。圍始解。擢川東兵備

僉事駐達州。乾有謀略。知兵。敢任事。陳士奇之罷巡撫也。蜀人仕於朝者。請用乾。而廷議用龍文光。明年八月。成都陷。文光死。士民乃共推乾行巡撫事。遣兵復重慶府。擊走賊將劉廷舉。南都因加乾右僉都御史。巡撫四川。大學士王應熊時里居。勿善也。及授命督師。乃劾奏乾淫掠不法。詔奪職逮訊。而道路梗塞。使命不至。乾行事如故。乾在重慶。移檄討賊。劉廷舉既敗歸。賊遣劉文秀率數萬來攻。乾登陴守禦。副將曾英聞重慶急。與參政劉麟長自遵義赴援。先遣部將于大海。李占春。張天相等。分水陸進兵。而已率精兵間道襲破賊營。取其旗幟。還于大海等夾擊。賊大敗。脫走者不能十一。乾因留英同守重慶。久之。清兵入川。獻忠伏誅。其黨孫可望等。率衆南奔。大軍追之。至重慶。乾出戰。兵敗而死。南疆逸史

龔尙書傳

田亮勳

龔尙書彝者。和梅其字。明洪武初。其先世某公。自山東徙居雲南。遂爲順寧人。公以天啓乙丑進士。官南京兵部員外郎。遷郎中。爲史閣部所器重。以事使桂林。而南都陷。永明王立於肇慶。公留贊巡撫。畢公式耜機務。已而返滇。己丑四月。公以在籍郎中。詣肇慶。至則與楊畏知同被王恩命。加兵部侍郎。戶部尙書。隨王奔滇。王以公與滇人習。命往蒙化永昌順寧等處徵募兵糧。未復命。而我大清兵入滇。王走緬甸。公茹痛微行。追至騰越。不及。復返鄉里。逾年得招討李定國密書。知王所在。乃持定國書。往說各土司起兵。公門人沅江土知府那嵩。

亦起兵應之。軍威稍振。大清兵已爲吳三桂引入緬境。素王諸路兵聞王執送吳營。遂止。當是時。公之痛不欲生者數矣。既出趙州。遇王則尾行。以至滇城。具酒食言於守者。得進謁王。且拜且哭。且進酒勸飲。王勉飲。而公愈伏地痛哭不能起。亦不能飲。至於淚盡。繼之以血。竟觸地三日。先王而死。先是。守者內憚於三桂。拒勿許見。公毅然曰。此吾君也。我爲其臣民。君臣之義。南北皆然。我祇一見耳。何拒我爲。守者往啓三桂。三桂許之。乃入見。至誠所動。金石爲開。雖以貳臣如三桂者。亦因公陳義甚正。詞不惡而嚴。不能阻公之一見。而公卒以此成千古不朽之名。嗚呼。明季忠烈之士如公者。曾幾人哉。公之大節炳然。固非其鄉之人所得而私。而其鄉之人爲余談一二軼事。又以見公之艱苦卓絕。自其少時已然。而其流風餘韻。至今猶宛然在也。初。公嘗讀書於距城二百里之蝻蟻岩。蝻蟻岩者。一徑斜上。羣峭摩天。有纖塵不到之概。公於岩壁鑿石嵌屋。人以爲勞而無功。而公仰高鑽堅。竟成其志。更於岩顛造一小樓。以居以讀。聲琅琅飛出雲表。如是者亦有年。其文字奇偉峭折。顧以國變。奔走倉皇。率皆散佚。今所遺者。僅城北飛來寺碑。語多禪理。而立達宏願。流露行間。係以戊子在籍時作。吉光片羽。其鄉人尤寶貴之。

論曰。征緬之役。吳三桂以明室舊臣主其事。追執永明王。至死乃已。史臣編纂明史初稿。以三桂凶狡不終。削其姓名。但書愛星阿等分路督師。而聖訓煌煌。謂三桂爾時已包藏禍心。

其統兵臨緬傳諭執送由榔不足爲三桂之功轉足正三桂之罪正宜據事直書用彰元惡恭釋訓詞凜然春秋誅心要旨洵足褫奸回既死之魄矣而如龔尙書者當遣灰已燼其不惜效死君前對鏡參觀所奪在彼則所予在此可知也夫主至已幽辱而求見而痛哭尙書豈欲及吾主未死猶思以酒醴之雅朝拜之文感悟逆臣耶然就獻食而論其與馮將軍蕪羹亭豆粥滹沱河麥飯亦復何異乃彼則每飯不忘而此且慘不下咽所遇固殊焉悲夫探訪

那嵩別傳

袁嘉穀

舊史氏曰余讀明史吳貞毓傳附那嵩嵩忠武之節彰矣元江在明爲窮邊而乃鍾此偉人也哉獨惜傳之未詳耳嵩字維嶽元江土司族世掌他郎寨繼襲土司遣弟崙關普洱居之普洱山河千餘里迄於今巍然重鎮嵩功何如哉施琅平臺左宗棠省新疆鉅細雖殊功則一也然此猶其小焉者桂王西奔嵩大計欲平緬爲一省如不歸國卽爲卻步計作耶律大石之續蓋有餘也王授嵩巡撫嵩子燾知府弟崙嶧皆將軍嵩計果成斯中國萬年良圖也寧止關繫朱明哉闕人扼之不果順治十六年秋嵩與子燾約許名臣高應鳳抗吳逆冬逆圍元江誘嵩獻許高以和嵩曰三人共事豈以生死易心乎逆射書城中勸降嵩亦射書城外數逆入關後罪狀且署其舊銜曰山海關吳三桂開拆凜凜八字勝琳瑯檄文多矣嵩自

焚燹。燹名臣皆殉。次年崙自普洱遣子降。己則不復出。殆以中國土地爲重。不肯以附外國。必非歸心吳逆者。權衡輕重之間。未可尋常測也。萬季野先生史稿。人人欽崇。獨其省緬一大計。猶嫌略焉。故別傳以質國人。臥雪堂文集

那烈愍公墓表

劉達武

公諱嵩。字嶽生。姓那氏。世爲元江人。其先世有名直者。當明洪武平滇時。以土官首先投誠。西平侯沐英爲請於朝。璽書褒美。改元江路爲元江府。命世守之。終明之世。那氏遂世襲土府焉。公性純篤。任俠重氣節。讀書不倦。嘗築樓藏書數萬卷。其中與麗江木氏順寧猛氏書樓鼎立。天南爲滇中士大夫所豔稱。方明末葉。永曆之奔緬甸也。道過元江。公率其世子燾。迎謁供奉甚謹。設宴皆金銀器。宴畢。悉以獻曰。此行上供者少。聊以佐缺乏耳。帝旣奔緬甸。招討使李定國不敢深入。乃引兵自孟定。過耿馬。抵猛猛。兼有木邦。孟良諸地。軍威稍震。聯合古刺。暹羅諸小邦。並遣使通閩。以圖大舉。用勅印號召諸土司。公受總督銜。密爲傳布。各土司皆響應。時延長伯朱養恩。將軍高應鳳。總兵許名臣。土司龍贊揚。皆降清而復返。戈與公爲犄角勢。以牽制吳三桂之西。旣而三桂督師至石屏。土司龍榮。率其壻黔國公之子沐顯忠。赴軍前降。已成瓦解之勢。公猶日詔土兵而申警以大義。三桂率全師圍其城。公出西門。與戰不利。益繕城隍。嚴守備。誓與城爲存亡。相持三月。糧盡。人相食。公知事不可爲。乃慊

慨整衣冠。率子燾及家人。登樓自焚死。其士兵多巷戰死。全城皆屠。時清順治十六年冬十一月也。清定鼎後。謚以烈愍。其族人爲衣冠墓於縣南文筆山麓。盡徙居於九龍江外。元江遂無苗裔焉。嗚呼。公以萬里孤臣。於明社方屋之際。而能起義勤王。以抗強虜。卒能畢命。遂志。與城俱碎。豈不偉然烈丈夫哉。乃三百年來。湮沒不彰於世。是不可悲已乎。故爲蒐採史志。私家各著述。輯爲此篇。以揭諸墓道。使天末孤忠。有所表見焉。抑考之紀載。明末殉難諸臣。滇中以戶部尚書龔彝爲最烈。而公實爲彝門人。取義成仁。爭光日月。誠哉。是師是弟子云。元江縣志稿

明贈光祿寺卿楊公贈卹紀實

楊繩武

前贈光祿寺卿楊以成。字太和。雲南澂江府路南州人。由選貢授貴州貴陽府通判。駐鎮畢節衛城。畢節環城皆苗蠻巢穴。維時水藺霑烏等苗。屢行仇叛。以成多方勦平之。又助征兩江都順監。及定廣洪等處邊備。積資荐陞本鎮同知。七年九薦。以陞卸仍駐畢節。天啓元年。四川土宣撫奢崇明。因徵兵悖叛。水西土目安邦彥。亦乘釁合謀。以成以畢節地相近。先期預探賊謀。稟聞上官。練兵利械。偵守隄防。而安賊方計誘按撫。俾往畢節監軍。希圖就執。以成聞知。星夜稟阻。不墮賊計。至天啓二年正月。崇明果密通邦彥。遣酋目張紳等。統賊兵數千。圍攻畢節。以成星馳告變。爲城守計。賊攻圍甚急。以成獎厲士民捍禦。身率壯健。出城冒

鋒力戰。生擒叛目徐黑乍。殺散賊無算。餘賊畏退。旋復抱恨。蟻集攻城。益力以成度勢。衆募不敵。密將印信間道差送黔藩請援。集衆歃血誓曰。吾義當與此城共盡。爾士民家俱在城。亦當協力保守。於是衆皆願以死從。當是時。奢賊方以重兵圍成都。殺巡撫徐可求。據重慶。分兵圍夔州。遵義。瀘州等郡。安賊亦以五月圍貴陽。分兵破甕安。襲偏沅。以阻援軍。殺巡撫王三善。總兵楊愈懋。道路隔絕。援兵不能進。畢節城汛兵不滿百。以成與賊攻守相持。逾半載。及七月內。始聞援兵。不料至卽夜遁。奸吏阮世爵等。從內應之。城遂陷。以成自縊未死。賊入署撞見。遂縛以組。擁逼至鴿了賊營。家屬楊定等一十三口。盡遭屠殺。惟弟以榮僅存。以成復於園中將賊衆情形。密書五紙。納竹筒內。乘夜令以榮以一紙赴滇求援。以四紙糾合豬場屯海洞等四處歸義漢兵。訂期協勦。以冀犁庭掃穴。以榮行至散納溪。被賊搜獲其書。殺之。賊於是深恨以成。前後忠謀不屈。隨寸割以成於火掌宅溪之地。臨死罵不絕口。時年五十有七。以成子振南。起南。興南。冠南等聞訃。痛父死難至慘。罄產募兵。自備糧餉。兩次援黔血戰。復赴闕陳情。天啓四年。先經貴州巡撫御史侯震暘題奏請恤。難臣一疏。奉旨。贈按察司僉事。賜葬。復經總督蔡復一巡按傅宗龍奏請死難之臣宜加優恤。一疏。奉旨。閣部議奏。經閣部准照以成子興南呈。援貴州安順府死難推官徐朝綱子徐天鳳。比照四川興文縣死難知縣張振德子張紀爲父陳情。並蒙優恤之例。覆請優恤。於崇禎二年奉旨。有楊以

成死難甚慘。既與徐朝綱等例合。着該部查例具覆。隨經部查恤典覆奏。奉旨。楊以成闔家死難甚慘。其葬贈諡廕。與建祠立坊。均准照例賜給。以慰忠魂。楊以榮並楊定等。同時遇難。准俱附祠。春秋致祭。餘俱依議行。該部知道。欽此。隨經吏部禮工等部。及尙書房覆奏。贈以成光祿寺卿。祭葬各一壇。勅翰林院撰擬祭葬等文。中書科關軸寫給。廕一子錦衣衛正千戶。世襲廕襲。應取嫡長孫楊琛襲授。本籍建立專祠。春秋致祭。並給領建祠立坊工價各等事。俱奉旨。崇禎五年。復經雲貴總督蔡復一等合辭題。據雲貴紳士李春華李開先等呈。請死難同知贈光祿寺卿楊以成。准入滇省鄉賢祠。黔省名宦祠一體致祭一疏。奉旨依議行。

忠節錄

楊忠節公傳

孫鵬

公諱以成。字太和。元忠臣普魯海牙八世孫。而古泉公鳴鸞之子也。海牙公生於蒙古。仕元官至武德將軍。大理路總管。移駐路南。洪武初。死國難。贈閔里伯。子泰。隱居不仕。易姓爲楊。遂爲路南人。八傳至公。天性孝友。古泉公患瘡痛甚。公不避臭穢。親爲吮膿。疾遂愈。既由選貢。生特授貴陽府畢節通判。時水藺交爭。霑烏搆釁。公多方調劑。後皆得平。復隨以助征兩江。都順監紀定廣洪邊軍功。陞本鎮同知。九薦欽賞。兩任奏績。當是時。蜀中土酋奢崇明叛。水西安邦彥起兵應之。黔撫王三善爲賊所殺。賊勢張甚。公預料賊謀。先鳴當道。訓兵利械。

偵守隄防。既而邦彥計誘巡按至畢監軍。欲於中路成擒。公聞之。力言不可往。賊謀乃沮。天啓二年正月二十七日。賊目張紳率兵數萬。兩攻畢節。公奮勇督兵殺賊。生擒其黨徐黑乍。賊畏且恨。既退。復糾衆乘夜攻城。城將陷。公密遣親信人將印間道馳送司署。乃集衆歃血。誓必滅賊。賊不滅。誓以身殉。衆皆泣下。願同死守。至夜。賊攻城益急。城外援師潛遁。城中奸人內應。城遂陷。公入府署。正襟自縊。曰。臣力竭矣。願爲厲鬼報國。賊入府署。見公縊。急解下。少頃。氣復甦。賊好語公曰。好男子。從我當不失富貴。公大怒罵賊。賊大怒。執公去。家屬楊定等遇害者一十五人。公在賊中。矚其間。密修書五紙。置竹筒中。遣弟以榮潛出賊營。至滇求援。並糾合豬場屯等。及歸義漢兵。連環協勦。至散納溪。被賊搜得書。大怒。遂殺以榮。隨礮公於火掌宅溪。公子振南。起南。興南。冠南。道南等。聞之。哀痛不已。捐貲募兵。兩次裹糧赴黔勦賊。多有戰功。天啓四年。事聞。詔賜祭一壇。贈按察司僉事。天啓七年。振南兄弟連名具疏。伏闕援例請卹。詔賜葬祭。建祠坊如例。廕一子錦衣衛世襲正千戶。楊以榮。楊定等。並得附祀。崇禎四年。上遣官諭祭。文載家乘。公居鄉仁惠。如買棺掩骨。散粟濟貧等事。鄉黨至今稱之。以其事不關於邦國。故不贅敘。其後振南以歲貢選安莊訓導。陞陝西紫陽令。起南登萬曆癸卯鄉榜。興南登天啓辛酉鄉榜。選浙江湯溪令。冠南以選貢任四川巴縣令。陞敘州府同知。道南以廩生終。長孫琛以庠生廕襲錦衣衛正千戶指揮使。至今子孫科甲益盛。人皆以

爲忠義之報云。志節錄

段恭節公祠堂碑

王錫袞

昭忠祠者。聖天子爲巴縣令。賜諡恭節。段公特崇褒錫。以風勵後人者也。祠成制備。有司循典例。歲修祀事。罔敢或渝。越十有四年。公長君大金吾。特疏請於朝。奉其母太恭人以合祔。而索記於王子。王子曰。儒者泥舊聞。謬託良臣忠臣之願。才人愴艱步。猥分死事成事之蹊。豈知性匪孤行。聿求厥是。理無豫設。唯變攸宜。三日睢陽完節。終歸於天。付一泓止水初心。適獲於我思。如段公巴江之役。授命臨危。輕身闔室。上自廷輦。下逮叟童。莫不式舞且歌。繼以漣涕。吁嗟甚哉。識者於斯。又爲之惜其才而悲其遇。何也。蠢茲逆藺。實逼處巴。畜異狡窺。匪伊朝夕。豈有所愛而不肯發。趙瑤出虎。鍾離化鳩。公用兼之。故足恃耳。自公捧檄入省。聞而曾謀決。又中丞氏移鎮點察。有易曾心。而曾謀益堅。迨及公歸。是云無所向。使公不離巴。有以待賊。未至議備。既至議防。綢繆密而巴郡安。公可不死。又使難發。公尙未歸。泣廷糾師。間道設伏。出其膽識。一舉而梟諸酋魂。并安會城。公可不死。又使公言策。獲行於撫道。操縱有法。不卽決裂。以俟公歸。猶徐議收拾。而將吏仍安。公又可不死。之三者。不能得之於當日。故曰。公遇之悲有如此。迺公所以死。則處之有其道矣。聞變入境。在戈戟瀾漫之日。輕車博帶。詩云委蛇。其神閒甚。且大義規賊首。以國恩國法爲言。其辭安甚。卒之賊亦相顧愕眙。

動色戒以無傷我公。而公終不以此小屈。其氣又浩甚。蓋摧椿折。不懈匪石之貞。鶴唳鵲啼。共解同仇之憤。惟其誠合。所以義生。故曰公才足惜。又如此。嘗謂國家不幸而多死節臣。使人致疑於造化。又大不幸而鮮死節臣。使人隱痛於人心。人心者造化之根柢。本固則基凝。本濁則流澗。是故誼辟英君。終不容置此於不問。古善用者。有若漢高之於丁固。唐宗之於宇文周。宋主之於樊愛能。或披其隱曲。或斥其生平。或並屏其黨與。而要之不若我高皇帝之於危素老臣。直以三字香名。洗換萬年遺臭。自是而往。遜國虎爭。歷朝豹變。莫不隨時隨地。霞舉雲蒸。所謂廉恥立而理道明。捷於影響。教化行而奸邪正。凜彼隄防。如茲今日。顯有昭揭。聖天子於公。其猶是行古之道與。若乃吉凶惑謀。甘處不才之木。初終易慮。遂成中變之絲。泡影豈孚。金石爲裂。瞻拜祠下。有餘泚矣。祠在劍治西金華麓。去賜塋二里而遙。湖嶽日星。回環映帶。考其始。繫公外大父刺史張公宏光舊廬也。公名高選。字讓字。萬曆己未進士。父汝元。封如公官。繼慈太孺人劉氏。如恭人徐氏。子暘。女泥金小姐。及義僕段黑子。以闔門靖義。今奉詔同祀焉。例迺備紀。爰繫以辭。辭曰。

聞公降夕之庭前。有神紳笏端且虔。載舞載揚。絲緋縷。人疑香鼓或生天。招引吾家李鄴仙。須叟影隱衆忻然。頭角崢嶸日異年。紅綾光罩藉盤鮮。百丈錦纏芙蓉川。突來狼豕蹂花筵。哀鴻馴雉不曾眠。鳧鳥乘風羽化翩。銜丹雞犬逐紫煙。鳳書層疊破重玄。下指蒼松與古榭。

千秋圍繞白雲邊。恭節錄

段恭節公傳

陳祚隆

恭節公段姓諱高選其先豫章南康人也元至正間宦於滇之樸榆復遷秩於劍川遂家焉公王父希顏生子七公父諱汝元其長也員於庠娶太孺人張氏繼娶劉氏生子二公又其長也公弟瀛選以明經出身從弟八人廷選壬子鄉薦與公同科會副邦選纂修中書其餘或對策彤廷或食餼膠庠皆一時知名之士吾劍稱巨族焉公生於明嘉靖壬辰萬曆丙午舉於鄉己未成進士初授四川巴縣令生子三長暉次曦幼暘公抵任後封翁攜諸孫挈家之任辛酉分房蜀闈事竣適逆酋奢賚叛索印於公公令吏役梁允成將印潛送縣衙挺身抗敵仰天罵賊曰身可殺而印不可奪遂靖難時公封翁與太母劉氏如恭人徐氏子暘女泥金義僕段黑子知公靖難俱相繼殉義僅恭人施氏如恭人楊氏長子暉次子曦得公及門之士黃某者感公知遇爲公存孤強扶母子出衙得以不死適公弟瀛選之任聞變直抵巴邑攜暉曦二姪扶八櫬歸里時公之節烈已聞於朝蒙加優恤第萬里孤忠子方幼穉尙未獲邀全典至崇禎初子暉字存蓼弱冠叩關哀陳父節蒙諭祭葬贈尙寶卿加贈光祿卿賜諡恭節入祠昭忠廕一子世襲錦衣千戶存蓼競揚先烈明懷宗嘗以腹心耳目寄之而錫之額及歸林則敬宗陸族盡捐例俸置義田有范文正之風而周急恤孤焚券修橋爲功

桑梓者。尤不可殫述。弟嘏。仁厚承家。芸窗苦志。雖以明經候外翰。而志未竟。遂然而德流厥後。仲子繹祖。與辛酉鄉薦。存蓼次孫諱。又與丁卯鄉薦。是皆恭節公之垂裕於無窮也。我朝修輯明史。禮部採訪啓崇兩朝名臣忠臣事實著作。吾劍獨及於公。已將恭節事實。備呈州牧轉達。繹祖遠念先人苦節。尋輯遺文。欲付剞劂。而表章之。余與段門世爲姻戚。繹祖又余壻也。其祖忠節始末。余尙睹記及之。因請於余而爲之傳。恭節錄

張化樞傳

汪有典

張化樞。雲南永平縣人。崇禎十五年。任湖廣漢陽府節推。賊自破巢之後。連破無爲。公以事謁淮撫史公可法。史公知其才。念無爲殘創之餘。守者非其人。使領州事。至則招流亡。撫瘡痍。發奸摘伏。邑賴以安。十一月。羣賊乘不意。夜襲城。擁公去。公渡橋卽投水。賊挽之。不得死。擁至桐城。使誘城。張公大呼曰。我無爲州正堂也。賊脅我。城切勿啓。賊怒。立刃之。十七年。安廬道杜某自無爲徙駐桐。有言西門岡上野塚。豎一白木牌。書無爲州正堂五字。此必張公無疑矣。當大呼守者時。倉卒不暇言姓名耳。明史外

邱公祠碑記

陳宏謀

唐太宗曰。疾風知勁草。板蕩認忠臣。昌黎謂士窮見節義。歲寒知松柏。凡守土之官。與縫掖之士。其節義一而已矣。吾於勝國寧鄉令邱公。及寧鄉紳士見之。公諱存忠。滇南人。崇禎之

季奉命宰寧。未半載。獻賊蹂躪湖南。州邑瓦解。守土官皆望風逃竄。公誓不與賊俱生。倡率紳士陶燻等約一百三十六人。齧指敵血。阻賊兵於南關渡頭。短兵巷戰。殺賊數千。猶懷印死守。以兵寡被執。賊欲強公降。爲置酒延上座。授印公懷中。公拋僞印擲賊。幾中賊面。賊仍百端勸公。公辱罵加厲。賊怒。縛至道林市殺之。同時殉節者有陶燻等一百三十六人。皆延頸受刃。曰。吾輩與公同盡節。死無恨也。邑人哀之。爲招魂以祭。新令黨哲爲立祠於北門。余將軍廟之右。春秋祀之。卽以僭死諸紳士配享。越今歲久。廟圯祀廢。祠地被占。公忠肝義膽之精靈。不享一俎一豆者。不知幾何年矣。予前次撫蒞茲邦。採入省志。正欲興復祠宇。以北行匆遽不果。此番再至。專檄侯令採訪祠址。重修舊祠。侯令尋訪不得其處。復以官紳忠烈終難缺祀。乃捐金於北門外官路旁。靈官廟之右。購隙地一所。重建公祠。祠屋三間。繚以甃牆。匾額於門。月餘告竣。專祝供奉香火。每年春秋二祭。庶幾公之忠魂永安永侑矣。其殉節紳士百三十六人。昔止傳陶燻。劉爲邦二人。今考縣志。又得周世美。周希麟父子。黎復淳。朱國昌。朱治昌。湯道揆。劉光賢。周易八人。共十人。係與公誓死同盡者。外更有抗賊殺身之諸生朱之榘。楊啓華。楊會英。彭日浴四人。雖不在百三十六人之內。而其同時同事。節烈亦同。俱載在縣志。侯令皆爲各置木主。列祀於旁。其無可考者。另置一主。統書寧鄉殉節義士無名氏一百二十人之位。俾寧鄉爲國死事之官。與見危授命之士。生則灑血而戮力。死則同

座而受享。官與士均與日月爭光矣。縣令侯可儀奉揚忠節。捐金建祠。以永厥祀。其志行亦足重云。採訪

明周節愍公祠碑記

趙瑜

曩居里。聞蒙化周節愍公祠甚著。及試令來長沙。復拜所謂二忠祠於濯錦坊西。二忠者。卽節愍與先公死難之司李蔡忠烈也。粗得公殉國本末。始知戰歿於瀏之官渡口。欲求當日郭君金臺所爲公傳。不可得。激昂卓嘆。想見其爲人。然公旣死於瀏。其遺風餘烈。或未之泯。當於瀏之人獨詳。去年夏。來宰茲邑。私竊幸之。亟訪公事跡。皆愕眙不知所對。邑乘又闕焉。未載公之死。至今才百八十年耳。遂令遺蹟湮沒。無片席血食地。豈忠節義烈固人所不樂道。抑亦興起之無具耶。瑜忝守土責。惕然滋慙。不敢以此或後。邑人士聞之。僉感躍襄事。適移建楊龜山先生祠。卽以其址爲公祠。請瑜允之。牒告大府。捐俸錢以爲之倡。於是鳩庀工材。築之琢之。髹之堊之。爲門爲堂。爲庭爲廊。鐘鼓有序。芹藻有位。燦然秩然。靡不具備。肖公遺像居之。事旣葺。迺撮公事略。刻諸石。俾後人之有攷焉。謹按公諱二南。字汝爲。自號石拙。吾滇之蒙化人也。崇禎末。以選貢爲長沙通判。盡職業。尋攝攸事。張獻忠陷長沙。惠吉桂三王皆走。公還。恢復疆土。撫集流亡。仁惠大著。乙酉。擢守岳。士民乞留。改守長沙。當是時。愍帝已殉社稷。流寇南竄。湖南北烽火被原野。鄂岳相繼陷。長沙獨當其衝。督師何公騰蛟與公

及三四舊吏。日嬰城固守。其年五月二十七日。李自成餘黨。焚劫瀏陽。公督黃朝宣王俊才。二營兵來禦。激勵將士。大有斬獲。六月八日。賊突犯官渡河口。與戰敗之。公亦被創。有賊將李活虎者。以公屢勝。兵寡且疲。引悍卒潛渡下流。繞陣後擊公。二將潰走。公獨裹創血戰。爲流矢所中。死於陣。參謀軍事吳愉被執不屈死。賊遂陷瀏陽。蓋六月十有一日也。事聞。贈公太僕寺卿。國朝乾隆四十年。賜諡節愍。於虔。公以身捍賊。衝冒鋒鏑。憤激而死。瀏邑陷。長沙亦漸不可支。其有功於斯郡甚大。而於瀏之民爲尤厚也。夫可毋死而死。畏死而卒。至於死皆不足。以言勇。惟其始以無畏死之心。而持其克敵致果之志。然後以一死爲足。重觀公之奮身敵愾。卓卓如此。斯其風節固可以媿當時。而勵後世。宜其俎豆尸祝。千載弗替。乃至不能舉其姓字。幾漠然與冷煙荒草共此銷滅。而況以死勤事於茲土。弗克與滇湘并隆其祀。將何以妥公之靈。而爲頑懦廉立之一助歟。瑜旣喜邑之士克勇於義。以共成厥役。而益嘆公之風節實足以興起百世之人心於無窮也。爰備記之。周節愍祠祀錄

忠烈周公祠碑記

許登隆

戊辰仲秋。余被謫襄州。聞湖南北人談前朝潭守周公盡節最烈。今守蒙爲公舊里。因讀遺傳。得諗知生平。公諱二南。字汝爲。少負經濟。節義自期。於明崇禎壬午歲。由明經領判潭州。未一載。獻賊猖狂。全楚淪陷。惟長沙殺戮更慘。公恢復殘疆。招集流亡。上官嘉其勞。題以司

馬理郡事。公治行益彰。剔蠹幣。免加派。拯遺黎於塗炭。收白骨於郊野。善政不可勝紀。潭人敬愛若神明。若父母。乙酉。晉秩太守。時王師平定關隴。闖賊南竄。是歲大隊焚劫平瀏二縣。平瀏乃長沙屬邑也。一郡振驚。合城皆遁。公憤曰。此賊淪陷都城。普天同恨。誓不共戴。日月必撲滅。以雪仇恥。卽親率官兵。壁師瀏陽。遇賊官渡河口。會戰。凡十餘日。殺賊數千。功上幕府。議請益師以盡賊。賊聞膽落。乞撫不聽。乃詭計潛濟上流。繞出陣後。公兵力甚單。旋師鏖戰。衆寡不敵。身中鎗矢。蹶馬沙場。然猶罵賊。寧殺一身。勿殺百姓一人也。制府何公騰蛟聞報。發兵討賊。賊就撫。得殺公賊李活虎。自言。歷恆岱。抵都燕。所當者破。戰鬪無如公力者。因命潭人設公像。縛活虎於前。百姓爭射殺之。哭聲振野。比殮。公鬚髮勁直。靈氣如生。然公北堂尙在。顧君恩不得。願母養。心亦瘁矣。自非忠義性生。學術純正。烏能臨變不惑。於大節昭然如是哉。嗚呼。公殆睢陽之化身與。公旣贈卿寺。崇祀潭之名宦。郡人企公之烈。祠以俎豆之。更得前任朗園蔣公捐資。卜地構祠。並迎本朝廉使李公興元之主。同祀祠內。李公當逆藩之變。盡節是邦。均爲郡人所敬慕。後之事君。聞二公之風。宜興感何如也。予下車日。士紳暨公嗣鼎乾。以碑文請寡學之人。何能表彰萬一。但念昔侍先少保總師延綏。值逆提王輔臣倡亂。冒圍請兵。克濟其事。今入祠。不禁徘徊流連。益歎人之所得爲者義耳。其濟與不濟。則命也。若公者。可謂烈丈夫矣。爰筆而書之。以誌不朽云。

廬江學博李君墓表

陳烜

昆陽鄉賢李公諱兆旂字士聘號三辰明思宗時任廬江訓導獻賊猖獗城破死之少子淳隨之官亦死之事聞詔入祠余奉命刺昆甫下車其中子演澄向余請曰吾父死於賊吾弟又死之願爲文以志不朽且死者萬一能有知將不悼其不幸於地下矣問其死事之始末演曰吾父於庚午歲薦司訓廬江乙亥年盜賊蠡起當是時廬以孤城獨守北門之管惟公是寄賊度不可犯選謀潛入偵虛實捕得同列相顧不敢發公拔劍手斬之曰吾立志掃除狂賊誓與此賊共存亡此何等時而猶懼慙耶未幾城陷賊入自東偏被執不屈死弟淳伏屍而哭哭畢罵賊亦死此演四十年來腐心切齒往往不知其涕之流落也問公之素履澄曰公爲兒時端謹不苟言笑事父母孝友愛鄉閭族屬其訓廬江也言行而身化之爲南京國子祭酒王昆華先生所器問其家世及身後之事澄曰先王父前萬曆甲午貢士歷官龍泉令棄弗仕義方嚴且切故廬江公得有成立公死廬江時澄輩遠在天南不知遺骸藁葬之何處也先孺人洪於叢屍中僅得其首領收之澄萬里伶仃奔負而歸飾衣冠卜葬於城西冠蓋之原弟兄八人獨演澄在耳淳又死廬無嗣孫男子八人雖一經世守然必求海內之有道德而能文章者爲先人表而出之余聞而悲之古者禮樂政刑之事與夫忠孝廉節之材皆出於學故師儒之選必慎重其人公仕於學而死於學職也季子淳從公而死於公

分也。獨怪天下之死於職與分者幾人哉。明之高祖列宗。三百年養士於茲矣。且高爵厚祿。所以待士大夫者厚。而當事者因循苟且。貽誤國家。甚者貪冒無厭。極其奉於歌舞田園而不恤。一旦賊至。倉皇無措。委宗社於荆榛。棄生民於塗炭。而仗節守義。顧得之苜蓿不飽之官。且父子相繼以死。嗚呼。是可歎也。滇南人文久著。風氣日新。公以荒徼萬里之身。慷慨就義。視死如歸。豈公之天性然耶。抑人心風俗涵育薰陶而致此耶。聞先生之風。當必有頑廉而懦立者矣。昆陽李氏族譜

楊玕雲先生傳

闕禎兆

嗚呼。明朝二百七十餘年間。士大夫之流弊。滔滔若江河日下。積而至于衰晚。隄防盡決。砥柱無人。迨流賊滋蔓。中外騷然。而士大夫之禍彌烈矣。求其挺身當天下事。置一己之成敗利鈍于不顧者。伊何人哉。臨安楊玕雲先生。以易經登天啓辛酉賢書。四上春官不第。崇禎辛未。銓曹循例除新寧令。甫七月。丁內艱。服闋。補晉之沁水。沁遭流賊焚劫後。百弊叢生。邑中張某憑顯宦。每年逋正賦九百餘石。前之令沁者。接踵被罷。先生直扶其事。聲明臺使。疏聞。奉旨切責。奪張某官。通行各直省。嚴著爲令。先生廉直之聲。遂聞朝野。詎知忌先生者。已不獨張某一人矣。蓋是時。門戶競起。宵小之黨無足論。卽所稱君子者。往往樹私人而忘朝廷。爭標榜而無實行。各持意見。互相傾軋。傾軋不止。轉爲調停。雖有一二端人正士。限于郎

署。偶試鋒鏃。一發便摧。由是豪傑寒心。結舌箝口。率皆隱忍。以就功名。不則甘心肥遯。其登朝柄用者。惟是居官則滑。臨事則靡。不復顧所謂廉恥。且時事日非。而侵削如故。袖手如故。傾陷黨附如故。宜乎國事勢之終于不振也。先生治沁數載。庚辰舉卓異。尋爲張某媼黨。南京御史某誣不謹。去官。及其賦歸來也。鬚髮尙黑。每與所知論列時事。至徵兵借餉之難。忠佞不分之失。門戶紛爭之惡。任勦撫而無功。以朝廷爲孤注。未嘗不感慨悲憤。涕泗橫流。家居七年。蕭然如寒士。不交權門。當事者罕得望見顏色。日以著書爲務。兼善書法。精二王。屬文下筆輒千言。不加點竄。如自知樓點易集。所謂發明吉凶消長。進退存亡之道。亦云盡矣。向使國事可爲。起先生于朝。易文章而政事。破調停。疏壅蔽。排門戶。重事權。轉情面爲擔當。則危可圖安。敗可圖成。其設施當何如也。嗚呼。先生竟以著書老且死。而國家亦已覆亡矣。吾郡之不幸。國家之不幸也。先生死于丁亥年六月廿二日。流賊以五月廿二日屠臨安城。相距一月。先生之大忠大節。屹然天壤間。不可謂無物焉。以主之。先是五月十九日。流賊率萬衆圍城。先生知守者不力。城必破。破必不免。遂集家人曉以分義。繫環使各求自盡。廿三日城陷。舉家如先生教。惟一幼孫逸出。先生肅衣冠。望闕九叩。將自盡。賊已斬門入。遂被執。先生危言正論不少挫。其帥壯之。與同郡刑曹主政黃公天秩。廣信郡丞祁公上。合拘之。賊營。脅授監紀官。先生厲聲曰。君上安在。官從何來。與黃祁兩公終不屈。賊帥憤而兵之。嗚呼。

士大夫之禍。至此而烈極矣。禎於先生獨有感焉。先生之爲諸生也。讀書制行。志在三代以前。及爲孝廉也。絕不蹈頽風。求溫飽。至令蜀而以孝歸。令沁而以忠罷。生平抱負。略引其端。居鄉時。則用卷世之經綸。著書立說。而遭賊之亂。樹己之節。雖千百世後。與日月爭光可也。先生諱應柱。字靈實。號玕雲。其孫詡庵。名中原。今上康熙癸卯科。與禎同薦于鄉。禎於先生。孫行也。詡庵命作傳。不敢辭。先生著有文變十二卷。書變三十卷。自知樓點易集三卷。玉壺冰一卷。玉鵲案稿。檝居草。心如堂集若干卷。後之有志者。讀先生之書。而先生之爲人。益可知也。禎不敏。謹書其概云。滇南文略

席忠烈公傳

失名

明鼎革。孫可望自蜀據滇。迤東一路。遭其屠戮。兵至楚雄。前明金滄道副使楊畏知。盡力拒守。可望佯敗。誘至祿豐。啓明橋擒之。約願去其僞號。不屠迤西百姓。畏知志切匡扶。欲留身以有用。始姑降之。白井上珍席公者。明崇禎壬午舉人也。生平忠孝立心。才猷素著。久爲物望所歸。己丑六月。聞流寇據滇。公忠憤激發。糾集義勇。起兵討賊。姚州知州何思募兵應之。可望遣賊將張虎領兵來攻。屢破其軍。迫至安寧草鋪。賊來益衆。何思兵有暗降者。引賊從間道而入。截公歸路。兵敗。知州何思守備杜朝明。大姚金世鼎。俱歿於陣。而公被執。至滇。可望見公英姿特出。勇略超羣。欲收爲己用。每以好言勸降。而公罵以流賊。君父之仇。不共戴

天討賊不克。有死而已。賊黨謂滇黔兩省。皆聞風膽落。白井地附姚。一隅耳。渠獨奮臂當車。毅然抗拒。留之必爲後患。不可不除。可望然其言。故深恨之。剝其皮。至頸。罵猶不絕。遂磔之於昆明之市。已而可望遣僞官到井督課。井人李鍾武與弟鍾彥。設計誘至。熨夷田。令家客黃起龍殺之。事聞可望。謂皆公餘黨。卽遣張虎領兵勦滅白井。務搜公家屬。欲盡殺之。虎至白井。入土主祠。將謁拜。而士卒擁夫人封氏適至。指虎而罵。願求速死。虎憐其美。不忍殺之。令士卒環守廟門。內側舊有古井。封氏謂其卒曰。汝衆我寡。勢難得脫。給其回頭。乃以身墜井。全家亦投水溺死。虎念白井彈丸之地。而忠臣節婦。萃於一門。僅誅首事數人。撤兵而回。以張虎之殘忍凶惡。白井人民。得以生全。不致糜爛泯沒。靡有子遺。亦由公精誠之所格也。好義之士。盜公遺骸。與夫人合葬於東山席家墳。康熙初。滇南平。旌表前明節義。賜其諡曰忠烈。白井紳士舉公祀鄉賢。封氏入節孝祠。刪節白鹽井志

薛大觀傳

戴名世

薛大觀。字爾望。昆明人。其先于洪武中。由江南之無錫遷滇。大觀妻楊氏。生子二女。一長子之翰。之翰之妻曰孟氏。父子皆諸生。能文章。重然諾。以氣節重。崇禎末。羣盜張獻忠陷蜀。已而大清兵討張獻忠。破殺之子鹽亭。其將孫可望。李定國等。走滇。滇人多附可望得官。而大觀父子名士。或勸之出。大觀曰。嘻。此孫氏之官。賊官也。余義弗爲。當是時。永明王卽皇帝位。

于廣東。可望陽臣明。實不用命。而李定國與可望貳。迎帝入滇。可望走北降。滇人之前不附。可望者。皆爭出自表異。或又勸大觀。大觀曰。此李氏之官。仍非明官也。于是挈家隱居城北之黑龍潭。潭上有觀曰龍泉觀。有樓曰魚樓。大觀父子讀書其間。誓弗出。歲戊戌。大清兵破李定國軍。浸尋至滇。永曆出奔。如緬甸。大觀聞之。嗚咽流涕。謂之翰曰。國君死社稷。臣死君義也。今日之事。雖天命不可以力爭。願獨不可效死一戰。乃崎嶇城外。依小夷求須臾活。豈可得耶。吾書生不能徒手搏敵。計唯有一死。女其勉哉。之翰泣對曰。父爲國死。兒安敢不爲父死。大觀曰。女死誠善。第女母及女妻皆在。將奈何。當是時。楊氏孟氏皆在旁。乃曰。君父子爲國家死。吾姑婦獨不能爲君父子死耶。而旁有婢曰瑣兒者。抱大觀幼子在懷。聞諸人語。乃前曰。主等死有名。婢子何以處此。婢子死亦可乎。大觀曰。婢爲主死。亦義也。於是相率登魚樓。大觀夫婦上坐。子婦拜。瑣兒亦拜。拜畢。攜手下樓。俱赴黑龍潭死之。明日。屍相牽浮水上。幼子在婢懷。兩手抱如故。道旁人舉而瘞之。先是大觀之女。適同縣鄒生。是日隨其夫避亂西山。距魚樓數十里。兵至。火起。其夫復他逃。女曰。嗚呼。吾一婦女。將安逃脫。辱身非義。不如死也。亦赴火而死。

贊曰。自萬曆以來。天下多故。行閒大吏。計惟有逃耳。一逃而廣寧失。再逃而流寇倡。又逃而金陵亡。而閩亡。而滇黔亡。嗚呼。東南諸帝之死。視烈皇之死爲何如也。大觀諸生。以其家死。

無子遺焉。余讀其臨死之語，尤悲之。南山集

薛文學傳

附那蓋
皮熊

汪有典

公諱大觀，字爾望，雲南昆明人。子之翰，父子皆爲諸生，能文章，重然諾，以氣節重於滇南。張獻忠旣受誅，其將孫可望、李定國等走滇，滇人多附可望得官，而公父子名士，或勸之出，嘆曰：「此孫氏之官，賊官也。予義弗爲。」是時永明王自立於廣東，可望降於本朝，滇人之前不附可望者，皆爭出自表異。或又勸公，則曰：「此李氏之官，仍非明官也。」於是挈家居城北之黑龍潭。潭上有觀曰龍泉觀，有樓曰魚樓。父子讀書其間，誓不出。歲戊戌，大兵破李定國兵，浸尋至滇。王出奔如緬甸，公聞之，嗚咽流涕，謂之翰曰：「國君死社稷，臣死君，義也。今日之事，雖天命不可以力爭，願獨不可效死一戰，乃欲走蠻邦以求苟活，不重可羞耶？吾書生不能徒手搏敵，惟有一死爲天下明大義，汝其勉哉。」之翰泣對曰：「父爲國死，兒安敢不爲父死？當此之時，公妻楊子婦孟皆在旁，曰：「君父子爲國家死，吾姑婦獨不能爲君父子死耶？」鎖兒者，婢也。抱幼子在懷，前曰：「主等死有名，婢子何以處此？死亦可乎？」公曰：「婢爲主死，亦義也。」於是相率登魚樓，公夫婦上坐，子婦拜，鎖兒亦拜，拜畢，攜手下樓，俱赴黑龍潭死。明日屍相牽，浮於水上。幼子在婢懷，兩手抱如故。道旁人舉而瘞之。公之女適同縣鄒生，避兵山中，相去數十里，亦同日赴火死。那嵩者，沅江土官也，世爲知府，嵩嗣職。王走緬甸，過沅江，嵩與子燾迎謁，供

奉甚謹。設宴皆金銀器。宴畢。悉以獻曰。此行上供者少。以佐缺乏耳。後李定國召諸土司兵。嵩卽起兵應之。已而城破。登樓自焚。闔家皆死。其土民多巷戰死。王被執。沉江。總兵皮熊聞之。絕粒七日不死。大兵遣騎執熊至。背立不順命。積十三日。不食瘠。十四日乃斃。仍戮屍。熊壻趙默亦被執。索紙書絕命詞就戮。

汪有典曰。嗚呼。永明之入緬也。隨從諸臣。皆短衣跣足。與緬婦相賀爲笑樂。大開賭市。晝夜呼盧不絕。爭賭毆拳。喧譁聲徹王寢。固宜緬人所輕而驅而殺之。且盡。因以及王也。嗟乎。此乾坤何等景象哉。而尙欲乞殘喘不死也乎。明史外

明忠義薛爾望先生墓表

吳存義

嘗謂慷慨殉節。易從容赴義難。難易雖分。而所以立天地之綱常。維古今之名教者。其理一也。有明之季。如史道鄰。黃石齋。劉念臺。陶庵。希正諸君子。或誓師圖存。或血書殉難。或投戈赴水。或題壁捐軀。下逮逸民處士。舍生取義。視死如歸者。指不勝屈。其英光浩氣。固足以壯山河而昭日月。感雷電而泣鬼神矣。而其遠處邊陲。闔門殉節。滇人士稱道弗衰者。薛爾望先生爲最著。先生姓薛。諱大觀。字爾望。昆明庠生也。以行誼著於鄉。明季鼎革。先生自嘆食毛踐土。當以國爲存亡。爰率家人詣城北龍泉觀。置酒亭上。慷慨賦詩。闔家視死如歸。其詩不存。惟留題壁云。庠生薛大觀。妻楊氏。男之翰。男妻孟氏。女夢雲。靜。婢蘭馨。願爲殉節之

鬼不願爲苟全之人。全家同盡節於潭云。題畢。遂赴潭死。數日。諸屍上浮。面各如生。寺僧驚其異。會土人合葬於潭側。按察使許公宏勳旌以聯曰。寒潭千載潔。玉骨一堆香。蓋紀實也。康熙五十九年。知縣朱公若功。請祀鄉賢。馨香俎豆。曠代如新矣。惟是松楸之地。落日寒煙。荆棘荒蕪。日就傾圯。過者悲焉。昆明中翰劉君復昌。孝廉倪君應頤。醵金脩葺。爲之翦灌莽。表碣石。封若堂坊。屬余敘其事。余嘆曰。士當匡居坐論。往往慷慨悲歌。談忠盡講名節。眞有不可一世之概。及一旦身臨其事。雖名列台鼎。位極公卿。身受國恩。世膺帝眷。而爵祿之念。係之富貴之念。係之。妻子身家之念。又係之。反有畏死倖生。苟全性命而不顧者。視先生之殉節何如也。抑吾尤有感焉。忠孝節義之事。士大夫固多。而求之婦人女子。往往難之。乃先生以君而死。忠。其子其女。遂以父而死。孝。其妻其媳。遂以夫而死。節。下至其婢。亦以主而死。義。忠孝節義。雖不同。而皆有以成其節。全其節。何節之萃於一門者衆。而先生平日之以大節勉其家人者。又可見矣。先生自書壁曰。殉節誠不愧其言也。雖然。先生特一處土耳。使其列朝右。秉國鈞。其偉烈豐功。當未可量。乃伏處草茅。鬱不得試。僅以節見。而率其家人盡沒於蛟龍出沒之區。是可哀也。然先生生爲有明之人。死爲有明之鬼。其英光浩氣。卽謂與誓師之道鄰。殉國之石齋。同一忠節也。可。卽謂與投戈之念臺。題壁之陶庵諸公。同一忠節也。可。又逸史載先生殉節時。所畜犬亦嚙婢衣。同赴於潭。事雖不經。亦足以見先生忠義之氣。

有以感召乎異類。又烏可以不傳。爰爲之銘曰。

華山奕奕。昆水悠悠。乾坤正氣。特鍾名流。有明祚移。天運環周。全家誓死。大節聿修。光昭日月。氣凌斗牛。千頃寒潭。載沈載浮。一坏香土。蹟著名留。鶴排其馭。龍守其丘。上朝玉府。籍冠瀛洲。馨香尸祝。俎豆千秋。

碑鈔

林啓俊傳

趙元祚

林啓俊。字柱伯。昆明人。崇禎癸酉。武元授僉書。管黔國公旗鼓。甲申。張獻忠陷蜀。雲南震恐。使李大贊率兵屯會川。防金沙江。啓俊率兵屯霑益。防可渡橋。吾必奎反。沐公檄官土軍以啓俊統領。會大贊進勦。平之。師還。而沙定洲始至。逗留不卽去。啓俊尙未回汛。跡其所爲。叵測。憂之。詣于錫朋。曰。定洲兵強。多詭譎。恐有變。俊兵在汛數百里。宜入言。請以兵伏第左右。備不虞。時錫朋用事。定洲厚賂之。反以爲多慮。及變。啓俊僅以親族數十人巷戰於五華山側。殺金盞賊首一人。並餘賊十餘。賊不得遽入。府門焚。沐公乘間出走。賊盤踞會城。劫巡撫吳兆元。啓俊避跡陟山。丁亥。援兵至。定洲遁去。會城無主。滇人憤殺從賊者。指爲沙黨。立梃死。不問。啓俊分別全活甚衆。同擒阮韻嘉。張國用。袁士宏等。送沐公正法。後沐公奉粵藩西行。啓俊從之。行益遠。從沐氏者多亡去。惟啓俊與朱縉兩人。沐公執手泣曰。汝二人從我。患難中二十餘年。我爲重臣。殉國固宜。如汝二人何。解所佩黃金盒。分贈。命之去。啓俊伏地拜。

哭。從行益堅。後緝被獲。啓俊從入緬。與沐公同死木城。

論曰。明末忠臣義士多矣。不幸而湮沒不彰者。豈少哉。粵藩入緬。沐黔國諸人同死木城。據也是錄。吾邑林柱伯在焉。而志乘缺之。豈無表其事者耶。三綱祠成。補入之。因爲傳。滇南文

略

申甫傳

汪琬

申甫。雲南人。任俠有口辯。爲童子時。嘗繫鼠嬉於途。有道人過之。教甫爲戲。遂命拾道旁瓦石。四布於地。投鼠其中。鼠數奔突。不能出。已而誘狸至。狸欲取鼠。亦訖不能入。狸鼠相拒者良久。道人乃耳語甫曰。此所謂八陣圖也。童子亦欲學乎。甫時尙幼。不解其語。卽應曰。不願也。道人遂去。天啓初。甫方爲浮屠。往來河南山東間。無所得入。嵩山復遇故童子時所見道人。乞其術。以師禮事之。道人瀕行。投以一卷。遽別去。不知所之。啓視其書。皆古兵法。且言車戰甚具。甫遂留山中。習之逾年。不復爲浮屠學矣。已而瘞其書嵩山下。出游潁州。客州人劉翁廷傳所。劉翁故潁州大俠也。門下食客數百人。皆好言兵。然無一人及甫者。劉翁資遣甫之京師。甫數以其術干諸公卿。嘗不見聽信。愍帝卽位。北兵自大安口入。遽薄京師。九門皆晝閉。於是庶吉士劉公之綸。金公聲。知事急。遂言甫於朝。愍帝召致便殿。勞以溫旨。甫感泣。叩首殿墀下。呼曰。臣不才。願以死自效。遂立授劉公爲協理戎政兵部右侍郎。金公以御史

爲參軍。而甫爲京營副總兵。然實無兵。予甫聽其召募。三日募卒稍集。皆市中窶人子。不知操兵者。而甫所授術。又長於用車。卒不能辦。方擇日部署其衆。未暇戰也。當是時。權貴人俱不習兵。與劉公公數相左。又忌甫以布衣超用。謀先委之嘗敵。日夜下兵符。促甫使戰。會經略滿桂敗。歿於安定門外。京師震恐。甫不得已痛哭。夜引其衆。縋城出。未至蘆溝橋。衆竄亡略盡。甫親搏戰。中飛矢數十。遂見殺。於是權貴人爭咎甫。而譏劉公公不知人。及北兵引歸。竟無理甫死者。距甫死數日。劉公復入路出師。趨遵化。獨率麾下營孃孃山。遇伏發。督將士殊死戰。逾一晝夜。諸路援兵不至。亦死之。堯峯文集

九世祖文俊程公傳

程含章

公諱文俊。百戶冠帶大志公長子。母劉氏。與大志公先後卒。公旣除服。應襲百戶職。時營衛已壞。官兵殘缺。十無二三。先時景東衛所官一百一十二員。至是堪承襲者僅有十家。崇禎十五年壬午。流賊李自成。張獻忠等。攻破天下郡縣。明室將亡。征兵調餉。多不應。雲南守巡洱海道。檄景東衛查報衛所官出身履歷。欲按冊檄調也。衛指揮彙造各官圖冊。移送掌印同知倪巽生詳報。聲明程文俊係應舉嫡孫。大志與正妻劉氏所生嫡長男。現今保送。比試承襲具文耳。實則道路梗塞。未嘗送也。越二年甲申。明亡。我大清世祖章皇帝定鼎燕京。雲南遠隔萬里外。尙阻聲教。土目沙定洲襲破省城。沐天波逃入緬甸。土賊如雲而起。景東故

夷地魯魁猥黑交亂其中守巡洱海道張某行文以公爲舍人責其督耕又奉文以程氏曠年久不承襲例降一等准公襲原衛左所試百戶帶兵勦賊至那敦殺人廠遇伏身中流矢歸至蠻窩卒葬於蠻板山墓今現存題曰將軍程公文俊之墓是時公子尙幼奉文行取公之兄弟承襲文顯等見明室已亡流賊滋熾不肯從賊乃易姓爲羅相傳明時程氏有旁枝祖故祖母某氏以子幼無人扶養招羅姓爲夫養子及子大遂隨繼父姓故應章應彩等祖先已姓羅至是文顯祖等因避賊難復改姓羅避難山谷間世職遂替迨天兵下雲南始歸田簞食壺漿以迎王師熙熙皞皞共樂昇平矣

論曰詩歌萋楚樂其無家兔爰之篇亦曰我生之後逢此百凶尙寐無聰悲夫何言之哀也我祖以衛所子弟遭明之亡勦賊捐軀名垂義烈二百餘年之世職於茲替矣然吾聞世祿之家鮮克由禮明室功臣子孫不自檢束坐法殞命亡家者不可勝數而吾家以微末百戶明存與存明亡與亡保身保家之道有足多者鼎革之際沙賊內訌加以猥賊猖獗生靈塗炭我祖文顯等改姓隱名不屈不辱先人清白之風豈有忝哉卒能使子孫繁衍沐浴清化久而彌光盛德之留貽悠然遠矣月川未是稿

...

...

滇南碑傳集卷八

晉寧方樹梅臞仙纂輯

明孝友

譽峨吳孝子傳

周澄

譽峨著姓吳孝先。樸實不苟言笑。齟齬時有至性。洪武年間。隨父近禮出遊。至桂峯村。遇一虎。白額黑文。咆哮自山而下。父被仆壓臥地。以二手仰扼虎腮。急呼子。子急解父腰劍。亂斫虎腰。虎立死。父遂得同歸。衆聞之。趨虎所。碎去其肉。吳子復取皮收之。鄉閭驚異。咸嘆曰。誠孝子也。夫虎爲猛獸。雖至強壯。少敢有撓者。況弱小之童。能斫以救父乎。是其一念之誠。惟知有父。不知有虎故也。使當時逡巡畏怖。則父終膏虎口。填虎腹耳。吳子誠可謂難能矣。因以虎兒呼之。余爲之表其孝。易名曰孝先。吳子曰。人子於親。有患必救。亦其分耳。表不表奚計焉。噫。此又見吳子之篤實。非矯激以驚世。其器識過人遠矣。世有爲人子者。親或臨難。乃委棄不顧。其或願者。又躬自表白。惟恐人之不知。視吳子寧不有間乎。此殆再世之許垣楊香矣。余故傳之。以勸世之爲人子者。採訪

趙重華萬里尋親記略

朱國楨

趙廷瑞。雲南大理府太和縣人。少讀書。能文章。補弟子員。數省試不第。棄去。改習青囊。所歷

名山水必指畫風氣融結聚散向背之略。或驗或不驗。將遊中州。且訪異人。於是囊一瓢。浮家而出。由貴陽入蜀。久之。泝江下荊州。謁武當。北轉許鄧。渡河洛。漳洛。以次於燕。又久之。無所遇。所過帝王陵寢。及古今將相名賢學士家墓兆。必規度。驗或六七。復東遊泰山。過闕里。南窺鳳陽。達於金陵。過浙訪天台石梁。及錢唐西湖之間。從侯二谷。陳敬亭兩方伯遊。兩方伯挾其書至湖。訪茅鹿門憲副。時爲萬曆乙亥也。年已六十。其在江湖間。亦十有三禩矣。問其家世。曰離家時。兒重華僅七齡。母與姊妹及蒼頭輩。殆六七口。存亡不可知。鹿門贈以詩曰。近獲陳琳江上檄。知君家世傍昆明。丁年數卷青囊出。白首一瓢滄海情。萬里關山花外夢。王孫芳草客中程。夜依南斗看天象。已卜使星馬上迎。別去五載。猶棲遲東海。并匿錫山道中。所遺妻已沒。重華壯且冠。年二十一日。夜歔歔而號不自已。葬其母。嫁姊與妹。請路郵于郡太守而出。衆危言沮之。華哭而題壁曰。少小違親十五年。思親不見日淒然。從今卽與家人訣。不覩親顏誓不還。華復自忖曰。吾少不諳父貌。卽道逢之。不識也。榜其背曰萬里尋親。又恐父東西南北之蹤無所定也。別爲繕寫里系及父年貌數千紙。所歷州郡都會之次。輒遍榜之。宮觀街市間。已而又曰。聞武當之山名天下。吾父好名山。當或過之。且聞山之神故靈。於是踰漢沔而西。禱之武當。蓋萬曆戊寅十二月二十有二日也。紫霄宮道士問攜之過太子巖。巖之陰有字曰。嘉靖四十四年十二月二十二日。雲南大理府人趙廷瑞朝山至。

此華讀之。哭且慟。道士謂曰。若父曩年駐此。若今過之。復同月日。可以卜相逢之兆矣。於是華亦尾而書之曰。萬曆六年十二月二十二日。雲南大理府趙廷瑞之子重華。蹤父至此。由南陽潁壽。東涉淮泗。泝金陵。又卒無所遇。謀曰。今且渡江矣。聞三茅峯冠江以南。吾且禱之。禱訖。宿觀音寺。夢玄帝鉤簾坐。華哭而前。訴云云。帝呼謂曰。汝父猶未死。如是者三。覺而爽然。從丹陽過毗陵。被盜攫其貲去。所遺者。獨前諸郡太守路郵耳。窘甚。且行且乞。次橫林觀音寺。忽一老僧杖錫而前。謂曰。孺子何從來。華曰。吾雲南人。吾父出訪中州諸名山。不歸者十有七載。吾是以萬里裹糧。蹤父至此。而猶未獲也。不幸爲盜所窘。且奈何。僧曰。汝胸所囊者何。曰。路郵。輒出以示僧。僧笑曰。汝父猶未死。客無錫南禪寺中。汝第往。又顧囑他道人導之。老僧忽不見。明日偕道人過南禪寺。遇一老翁。華心疑屬父。而猶未敢請。伏地曰。吾雲南人。吾雲南人。翁亦絕不識華貌。且以爲故鄉人也。於是攜之同道士南嚮坐。華泫然曰。吾父離家遊中州。故萬里蹤訪。以至此。翁得無卽吾父已乎。笑而應曰。吾離家已十七載。所遺兒比僅七齡。存亡不可知。焉能到此。華於是前攜而哭。并出所囊路郵示翁。讀之。始驚曰。吾卽爾父也。且前問母及姊妹以下。華隨一一口畫始末。父子迺相攜哭而拜。聞者無不泣下。轉相告。過寺刺本末。共爲嘖嘖。太息不能已云。

湖嶺小品

范孝子用修傳

徐養正

范運吉者。滇之蒙化人也。其先合肥。五世祖成。以軍功授指揮衛於蒙。遂隸籍焉。五傳生端。端生寅。寅自幼孝友知義。年十三。痛父端罹屯糧獄。懇得代繫。斷髮授春秋於獄中。侵尋二年。間關完逋以釋。益折節讀書。補學宮餼廩。計當貢。會同學史冊父子爲讎家誣以盜。死於非刑。寅不能平。執其寃以鳴。得罪。竟被黜。叩關不能達。以歸。妻趙已歿。寅有感於母之喪也。妻之亡也。四子之孱焉未立也。茫無所依。遂決意去之四方。以自放。時運吉年弱冠。爲郡庠生。號泣諫止之。弗獲。欲從之遊。母且未殯。乃謀脫婦左氏簪珥。置僕以隨。時嘉靖癸卯二十二年六月初一日也。寅遽長往。往後幾六月。運吉婦左氏併一女。遂淪喪。家徒壁立。鄉人舉之以殮。且給之。克襄其事。丙午二十五年三月。母服闋。隨儒者試不遇。然痛父客遊成疾。不能躡父行。巡撫應公聞其事。憐之。款以精舍。俾肄業焉。運吉每日夜稽首誓天曰。運吉有志功名。無心尋父。幽遭暴譴。明當刑戮。惟神鑒之。且禱於城隍。哭祈見父。二十八年己酉春。疾漸愈。迺製衲衣。作尋親計。提學胡公復慰留。秋試與薦。應公會許以兄子妻之。促成婚。運吉以誓不得見其父。不敢娶。乃攜子潤。不抵家而行。歷五載。果得父骸歸葬云。初寅與運吉別。謂曰。汝好放我。他日尋我於葫蘆山。運吉不知所云。迨迹父經夔州南山。見方士。室有懸刺曰。滇葫蘆山人范寅拜。始悟爲父出遊號也。益戚戚奔訪。書其背曰。雲南蒙化府不孝子舉人范運吉尋父。有報父生死者。父子與之爲奴。又爲尋父狀。布諸市。所過神祠。且哀且禱。宛

轉想像亦無應驗。由是適荊州。赴鄖陽。入京師。遵淮沂汴。歷山東。至太平寺。叩禱神祇。是夜夢父執其手指一大石曰。我死此石中矣。石宛類葫蘆。運吉大哭。圖石形負之。過臨清。又夢父曰。兒何不信我。我死四川河之南也。因復入太平寺。時應公巡撫山東。運吉尙未趨謁。而應公元日出。見運吉尋父狀。亟訪獲。邀入爲發狀檄報。其子潤因覆車湯陰折肱。治愈。及過應公所。復平地失足。折前肱。又爲治之。如舊。由是父子得以相依爲命。應公尋內召少宰。運吉固辭去。應公曰。吾見汝形神俱瘁。萬一不諱。我之責也。汝父旣去。致汝父子有今日之苦。若不全。奈何。盍轉移調息。再圖。因攜運吉父子。併一僕入京。曰。便尋訪。運吉至京。夜忽夢人語曰。汝當死也。運吉曰。死生有命。但恨未見父而死。不瞑目耳。屬子潤曰。我若不幸。汝當繼我之志。以尋汝祖。至於我死。應公必有以處。非汝所知也。言未畢。應公適過。聞之。哭。面慰之。復貽書曰。惺其心。以省知慮。以顯親揚名者。孝子也。昏其心。以損知慮。以捐軀辱親者。愚人也。每見自古豪傑之士。樹功名。顯父母。躋壽考。以無忝所生者。多自憂戚困苦中來。方其不自遣之時。匪不欲奮一死以自快。而此身所繫。則有重於泰山。所以寧忍隱而不敢失此身者。爲此故也。今見子行若思。坐若癡。惛惛不知所之。雖爲親委身溝壑。於親已失所望。又誰爲子表揚耶。慎須保愛此身。以圖大事。念之哉。念之哉。無何。運吉病稍瘥。應公復爲移檄四方求寅。未踰月。應公以致仕去官。語運吉父子曰。汝大事如定。慎勿吾負。但有消息。卽須相

報。吾佇目望也。遂與運吉相泣別。運吉病尋愈。再刻尋父狀。無慮數千楮。出京。途逢人輒拜詰之。誓不得父不生還。聞陝西有葫蘆山。欲往。而誤由武當道。遂上紫霄宮。過榔梅園。一大石邊。肉鬪馬蹶。既還。復如之。莫知其故。夜夢赤河無水而開。覺而詢之。人曰。傷哉。河無水必死。運吉泣曰。父豈死太和乎。復詢黃鶴。登岳陽樓。道出京山。渡赤河。趨承天。時背負尋父字。所過皆聚觀。有疑心。運吉卽出所刻尋父狀。徧給之。會庠生陳良士同門烏慈僕得之。持入學宮。良士適在學。見所布狀。驚曰。此非葫蘆山人之子乎。若不吾遇。雖奔走老死。弗獲也。卽遣其弟良臣。追運吉。款於家。運吉因問良臣兄弟。所以知其父之故。良臣曰。二十五年春。有內史廖彬。遇一老人於豐樂河。不下驢。怪而詰之。老人曰。我雲外人。非汝所頓挫也。內史怒縛之。老人夜不絕詈。內史復令人棄之溝中。良臣夜過。聞溝中有聲。就而扶之出。延之以歸。師事之。始知爲葫蘆山人。及其姓名。留半月餘。乃去。踰年。良臣上武當。過榔梅園。見葫蘆山人。不火食。坐樹下。嘗自稱曰。好快活。好快活。又踰年。再上武當。至前所過樹。已仆。問之。路人曰。死矣。死之日。坐雪中。飲水一盃而逝。弟子陳憲。服其行義。掩之石洞中。記嘉靖二十七年十月初四日也。運吉聞之大哭。良士母在內。言曰。此必葫蘆山人子。不然。何其聲之相似也。運吉於是拜陳母爲母。而兄事良士良臣。急要良臣同趨武當。良臣亦迷其處。遇道士王崇舉。指示石洞。儼卽所夢葫蘆狀。運吉向洞大哭。幾絕。外若有牽其衣者。遽欲啓之。或言曰。此

禁山也。奈何可輕啓。且果爲汝父。紫霄宮任持鄒厚。其弟子也。而翁必有手跡存焉。據是爲佐驗。可啓爾。運吉與良臣同往哀求之。又曲諭之。始得。遂於牽衣處掘得二骸。已爲人移出洞矣。先是運吉之欲渡漢江也。水且泛。不得渡。寓柴店宿舍。見小書二帖。凡父子兄弟相認。眞實刺血入骨。至是得二骸。眞贗莫辨。遂禱於天地。沃水刺血試之。其一枯者刺得入。而新者不入也。衆皆異之。運吉痛哭殮入棺。扶歸。其新者祭而葬之。提學太和雷公。兵憲張公。參戎李公。鈞州范守聞之。爲之立碑石旁。曰。雲南蒙化府舉人范運吉。領男范潤。尋父五載。感天得見。父骸骨刺血收殮。還鄉之處。方運吉之過荊州也。夜入遠安。值虎噬人。背有言者曰。有虎有虎。運吉避之得免。已而視其人不見。渡楊惱。爲舟人所給。人叢葦中。四面皆水。夜深雷雨大作。水漸泛。值艇入。渡之而出。其飢凍流離。困辱迷踣。幾死者數矣。而卒以獲免。倘所謂感天者非耶。運吉出五載。家人邈不相聞。父之骸已無所歸矣。而卒獲昇以葬。至自萬里之外。豈人力所能致哉。運吉廬墓三年。方迎娶。自巡撫孫公。前巡按黃公。廉其事。聞於朝。巡按劉公繼至。共樂成之。大書孝通明神額。表其宅焉。

論曰。運吉其赤子之心乎。夫出入顧復。若遠若近。若喜若慕。若踰若踏。盤折牽繫。不忍去。此孩提狀也。以予觀於運吉。殆能充是心者耶。其人之長而少也。視其父之死而生也。歷百折而不改其初。孔子曰。孝弟之道。通於神明。其得父骸歸葬也。宜哉。採訪

昆陽州李孝子傳

韓莢

自史傳列孝義。以敦本勵俗。公卿大夫。宜由此其選也。顧不少概見。而閭巷之士。或卑冗小官。行修於家者。多有或湮沒而不彰。余故及所見聞。而覈其不誣者。頗論著之。若李公蓋可述焉。公諱澄。字仲瀾。號果峯。雲南昆陽州人。拔貢。候選知縣。父兆旂。明末廬江訓導。流寇攻城急。分守北門。城陷不屈。與幼子淳俱死。公奔喪。匍匐宵晝行。忘寢食。數經賊中。幾死。得收骨以歸葬。訖。白州府父死狀。以聞於朝。崇祀鄉賢。更特祠曰靖忠。公每晨詣祠。必泣如初喪者。終身。本朝順治丁亥。滇中亂。公奉母洪。避山谷箐篁中。母疾革。囑曰。我不欲終於斯。可移置我淨地。公負母行數十里。至甸頭之香雲寺而絕。時四望無煙。哀號復負以行。至祖塋。去寺四十里矣。母故藏棺城北慈照寺。復奔。猝遇賊。爭欲殺。哭告之。故賊義之不殺也。時兄源。灌已先死於賊。公益慟。遂發病。嘔血。公兄弟八人。晚惟存兄演。事之如嚴君。事必告而服其勞。召之必在側。飲食必共。兄亦友愛。至今州中美其家法。公有德於鄉。歲戊子。州多故。山獮乘間入城劫官舍。有告幕府民反者。遣總兵往兵之。公道行。忽被執。總兵者呵曰。亂民耶。趣斬之。公色不動。力言山獮飢寒跳梁。不關平民。不惟民不可殺。獮亦不可勦。撫之便。會州守至。如公言。罪止魁而撫其餘。一州以完。至今德之。私謚之曰孝穆。嗚呼。公之事止此矣。無他奇行也。然如是亦足矣。滇於古百濮。近六詔地。非三代之教所加。然使家諭戶曉。率如公。豈

出鄒魯下哉。余又聞公先有尙文者。以滇處天末。少書籍。來江南購萬餘卷歸。而公之高祖
受嚴。以南京刑部郎守銅仁。課第一。訖罷官。亦購書萬餘卷。自號一蠹居士。後訓導死於忠。
而孝穆繼以孝。毋亦其讀書之助耶。然以余所聞士大夫。有擁卷軸至多。而子弟一無稱焉。
抑又何也。公之子從綱。方以舉人上春官。汲汲乎惟懼其父之不傳。亦可謂孝。余既得其事。
甚審爲之傳。俾藏於家。以待史之徵孝義者。且語從綱。子故藏書家。其復蠹焉可乎。昆陽李

氏族譜

昆陽李果峯先生傳

許汝霖

公諱澄。字仲瀾。號果峯。其先浙之蘭谿人。元食采於滇。明洪武初。有諱慶者。歸西平侯功。授
誥券。拜武德將軍。就家昆陽州。嗣後代有聞人。傳及父兆旂。廬江訓導。子八人。公其叔也。英
敏能文章。早歲入於庠。輒有聲。應拔貢。屬明季天下亂。賊急攻廬江。訓導部民守城。城陷。被
執不屈。肆罵以死。公哀號。晝夜不絕。聲動鄰里。奔收遺骨返葬。遂條其忠烈。泣請當道。事聞
廟食。更特祠以祀。公日詣祠下哭拜。數十年如一日也。皇朝初定鼎。滇境以遠。未經王師。寇
盜充斥。蹂躪鄉縣。公奉母洪。避山谷間。母疾革。囑曰。我不願終此。移我清淨地。卽負母徒步。
行數十里。至甸頭香雲寺。旣逝。無木可殯。復負屍走歸祖壘。至城北古寺。掘取舊所藏棺。遇
賊。欲加刃。急以情告。賊哀而釋之。母始得殮。時人心不定。近州山裸。乘寇勢入城。縱劫掠。有

將駐昆陽者。混以民變上戎府。將合境殲之。州人大恐。公道行被執。力言於帥曰。將言殊誤。今日之役。不惟州百姓不可輕殘。卽內甸裸民。亦迫於飢寒。非好亂也。搶攘方殷。遽行勦殺。此輩知必死。捐生以鬪。禍之大小未可知。不如息兵善撫。帥然其計。命公還州。持檄多方勸諭。獲其魁。餘悉平之。逮王師入滇。天下大定。公遂絕意進取。杜門飲酒賦詩。日率諸子講授經義。昆使者以賦籍軼於兵燹。請詳迫公踏丈。公公慎持平。俾國計民生兩無覺。公性忠恕。與物無爭。誠意孝友。昆季殉難者。執喪如其子。事兄嫂終身不敢有忤色。居家儉素。宗族鄉黨。有不能婚葬者。殫力助之。兼置義塚。而孤寒子弟。尤多鼓舞。以底於成。嗚呼。斯可謂君子也已。

論曰。盤根錯節。以別利器。公之一生。備極險阻。有非豪傑所得支者。而公以書生勝其任。才益以鍊。行益以篤。孟子所謂動心忍性。公實有之。乃卒不得志。坎壈以老。光大前徽。其在後人乎。昆陽李氏族譜

李仲瀾明經傳

趙士麟

仲瀾名澄。昆陽人。明季拔貢。候選縣令。游膠庠。數以行舉。高祖雯巖公。諱資坤。以明正德癸酉鄉榜。任南京刑部郎。性嚴介寡合。出守黔之銅仁府。考天下廉吏第一。嗜書。購萬餘卷。自號一蠹居士。著有風教錄。仲瀾讀其書。兢兢惟高曾矩矱是守。父三辰。仕廬江訓導。乙亥流

寇圍城分守北門。城陷被執不屈。挈幼子淳同死之。仲瀾聞憂。哀毀逾禮。奔收遺骨而葬之。抱終天之恨。紳士以父忠節。請於當事。崇祀鄉賢。更建祠以祀。額曰靖忠。每辰詣焚香泣拜。如一日。丁亥。流寇入滇。奉母洪氏避山谷。母疾。囑曰。我不願終於斯。可移我於淨地。仲瀾背負母行。力竭。哀乞村人助之。移至甸頭之香雲寺。遽逝。時四野無煙。復乞前人。合號負骸。至祖塋。直至城北之慈照寺。掘藏棺。賊見欲殺之。哭告以故。賊感而義之。始聽取棺。收母骸。權厝及平。乃治喪事。遠近悲之。戊子。流氛擾滇。野賊烏合。入州城。劫官舍收糧。將官某。星馳往報。稱民變。請勦。民盡逃。果遣總兵崔副將王領兵至。公同壻行至清水河被執。將殺。幸王副將識公。面釋而訊之。因痛陳地方情形。實因山獠飢寒。兼爲征糧迫。故變。非關百姓。今日之事。不惟玉石宜分。卽裸人亦不宜輕勦。否則反不可測。撫之最善。適州守鮑公來迎。泣陳與公論合。遂招撫。戮其渠首。餘悉保全。公之力也。兄弟八人。卒於兵燹者四。蚤殤者二。止仲長依公。兄弟友恭。周公爰訪。旌其門曰孝友。并賦其事。生平無疾言遽色。與人和。御下寬。周人之急。能排解。里黨婚喪。倡義助之。壽七十卒。此其大略也。

論曰。傳云事親孝。故忠可移於君。事兄弟。故順可移於長。居家理。故治可移於官。仲瀾公值倥偬。仕難言矣。卽其事親也。當寇氛擾攘之秋。父與弟死於難。數千里奔赴。負骨返葬。母避亂。遭疾。出萬死一生。負骸並葬。噫。苦矣。論孝於承平易。論孝於亂離難。若公者。可謂處人倫。

之極變。而當勢事之艱危。此非常之厄。而能成其孝於古今未見之遭。全友愛於莫可如何之際。故曰難也。此其事親事兄兩無愧。至於居家之理。使得一官。吾知召杜匪難。再比干可同烈也。令嗣從綱。登丙子賢書。公車至都下。請予傳。故書之。讀書堂全集

昆陽州孝子李澄傳

王思訓

李孝子澄。字仲瀾。號果峯。私諡孝穆。先世浙之蘭溪人。元末宦於滇。爲巨橋萬戶丞。巨橋今之昆陽州也。明初三將軍平滇。始祖慶以反正功。世襲武德將軍。遂隸今籍。傳至父兆旂。明季歲貢。授廬江訓導。會張獻忠急攻廬江。兆旂固守北門七晝夜。城陷不屈。與幼子淳死之。澄聞難。奔赴。孤行數千里。匍匐鋒鏑間。瀕於危者數數矣。卒能收父骨歸葬。復以父死事狀。白有司。入告。得祀典。特祠曰靖忠。澄痛父之死。每晨必詣祠哭拜。慘動路人。丁亥。寇賊入滇。奉母洪。避山谷中。母疾革。曰。我不欲終於此。可移我淨地。澄負母行數十里。至甸頭之香雲寺。而絕。母早藏棺於城北慈照寺。復奔寺取棺。遇賊欲殺。哭告之。故賊義之。舍去。乃得棺厝。母兄弟八人。泳源。灌。演。清。淳。匯。一卽澄也。行六。淳同父死義。至是源。灌又死於賊。澄益痛。遂發病。嘔血。晚惟兄演存。事之如父。事必咨。召必側立。飲食必先奉。必豐必潔。兄亦友愛。先是戊子。賊氛未息。山獫乘間入劫。有以民變告渠帥者。遣兵往屠之。民遁。澄走至城南清水河。被執。將殺。澄色不改。力言山獫飢寒。且苦征索。非關平民。爲今日計。不獨民宜撫。卽獫亦宜

撫迫則反戈。未可測也。適州牧至。如公言。罪止其魁。一州獲免。及本朝平滇。滇使者以賦籍散佚。將履畝。定其額。澄憮然曰。西南故瘠土。況在逃亡後乎。不辨。是遣吾鄉累未已也。剴切開陳。事得寬平。其有造於州類如此。澄以前明選拔。例得爲令。而痛父死王事。且愴懷故國。遂絕意仕進。日徜徉山水間。手一經。教子若孫。又性忠恕。與物無忤。積行敦義。族里咸引重焉。

太史氏曰。余嘗過巨橋之石嘴橋。有唐河東州刺史王仁求及其子善寶墓。桓碑在焉。仁求忠於唐。善寶繼之。至今滇中人猶有能道者。而史不傳。又城西靖忠祠。蓋州人李兆旂廬。江死朝廷。從其子澄之所請也。兆旂忠。澄孝。與王氏父子。後先爭烈矣。史冊有能紀其軼事者乎。嗟乎。南中義烈。以荒遠而滅沒。弗彰者。可勝道哉。昆陽李氏族譜

昆陽孝穆李公墓銘

張希良

昔仲微之跋華陽國志云。漢至晉初四百載間。士女可書四百人。後自晉至周顯德三百載。而文紀紀者無幾人。忠魂義骨。與塵埃同灰。何可勝數。豈不重可惜哉。由是觀之。殘篇斷簡。埋沒英豪多矣。而況蠻煙瘴雨之鄉乎。是以於孝穆先生諱音使墓之文。所不容避焉。謹按先生諱澄。字仲瀾。號果峯。雲南昆陽人也。先世居浙之蘭谿。元宦食采於滇。授巨橋萬戶丞。始祖曰慶者。明初歸沐西平。以功世襲昭信校尉。封武德將軍。遂隸今籍。派分而下一傳贊。

廩生潛德好修。時謂之中州人士風。再傳尙文。字文仲。博學工文筆。恨僻壤無書。偕子滄孝廉。自江南購萬餘卷歸。教鄉人。號醉樵居士。傳載通志。四傳鳳儀。庠生舉鄉飲賓。載郡志。其間文章節義。指不勝屈。如諱元吉。諱昱。俱科第。隱居不仕。諱資坤。號雯巖。登正德癸酉賢書。仕歷南北部郎。遷銅仁府知府。考最爲天下廉吏第一。賜燕於光祿者三。公居其首。復購萬餘卷。自號一蠹居士。著風教錄行於世。名宦鄉賢兩祀之。載通志人物。迨傳應春廩生。父喪廬墓。載郡志。生子桂。模。楨。梓。製書楊四。可枕案。置家塾之四隅。率讀。皆以明經著。梓尤精易學。名重於時。桂字秋宇。河南唐縣司鐸。特薦陞龍泉令。歸養日。究性理之學。足不及公府。爲士族法。屢主賓筵。著虛受軒集。載郡志人物。是爲先生祖。生兆旂。字士聘。號三辰。歲薦授廬江學訓。署縣篆。崇禎乙亥。獻賊攻城。守北門。城陷。被執不屈。與幼子淳死之。崇祀名宦鄉賢。載通志。卽先生之父也。忠烈公有子八。泳。源。淮。演。清。淳。先生於次居六。承累世清白忠貞之緒。早自刻勵。志趣不凡。居心制行。悉本忠恕。喜爲人排難解紛。時號彥方。當戊子流寇駐滇。山彝入城掠官署。指民叛發勦。抗言大師之前。保一州不叛。臨以白刃。無所怵。其所全活實多焉。兵燹。昆民賦額缺。州牧按於上。履畝清丈。務符古經制。簡勘之時法嚴。先生退而謀曰。滄桑更易。今昔懸地。且瘠甚。如荒熟不分。是貽吾里世世子孫累也。力建議。別可墾難墾若干畝。以經國紓民。鄉人至今頌不衰。生平種德事皆此類。而孝友性植力行。人之所難。

學校數以優舉。周公爰訪蒞昆時。曾表其閭。且爲詩以紀之。方忠烈公之嬰賊也。先生聞變。踰號萬里。於兵烽榛棘中。往負其首領衣履而葬。復同兄源貢士。演太學。以忠烈公死事泣。請當途建祠以祀。則張去疾之風也。歲丁亥。里中寇逼。母太夫人洪氏病。哀號昇之遠遁。及卒。復昇之還殮。時賊拒州城。祖墓距城咫尺。負土成墳。若不見賊。賊亦感其義而哀之。卒得成禮。則江次翁之概也。昆季死於寇。乏嗣。痛切鵠原。執杖以應弔客。家事必先其長。事兄若父。事嫂若母。則司馬君實之義也。其琅琅大節。卓乎可紀者若此。先生以選拔例得爲令。而痛父死王事。嘗廢蓼莪之詩。遂無意仕進。日徜徉山水間。手一經課子。若將終身。益積行敦。義士大夫無不引重之。子七人。長從嶠。學博。次從綱。鄉舉。次從祐。從昉。從紳。從端。從靖。列於庠。孫男十。長暎。補弟子員。次畋。甫。十二冠童子軍。若暘。若昭。若昕。與晴。曷。輩皆偉秀。鵲起蟬聯。蒸蒸未有艾也。然則天之所以報先生者厚矣。先生生於明萬曆甲寅年九月十九日。終於康熙丙辰年十二月二十日。春秋七十。原配孺人張。庠饌景曜公女。先先生卒。繼娶孺人陳。教授鴻禧公女。生於崇禎癸酉年二月初八日。終於康熙庚午年十月二十一日。今之子七人。皆孺人陳之所出也。先生以丁巳年三月二十五日葬州城西祖塋冠蓋山。配陳合兆。爰系以銘曰。

百行之原。莫先孝弟。在天爲經。在地爲義。嗚呼先生。永錫爾類。峨峨冠蓋。昆池相望。佳城鬱鬱。

鬱山高水長。先生之魄可掩。而名不得而藏。昆陽李氏族譜

李仲長墓志銘

浦起龍

余之客滇也。昆陽李生蘇學來問字。暇則道其先世遺事。百餘年元元本本。其見於名賢論著歌咏之冊。蓋其家哀而軼之。以信其後者也。李氏多賢子孫。抑先德源流。可謂遠矣。太學公生明晚葉。學既成。入國朝。不以干祿顯。歷死喪禍亂。手濟艱難。瀕於殆。益固以安。父士聘公司訓廬江。值獻賊來寇。捍城。城陷不屈。事從者幼子淳。其後走萬里。負骨歸者。第六子澄。二子於太學並爲弟。是時滇復多故。流寇山獮。先後蔓延。更數歲。兄源。兄淮。相繼遇賊害。太學孤窮一身。支撐門戶。翼遺嫠。以庇而生。父若弟骨未歸。引領北首泣。比至。營窀穸成禮。偕弟澄奉老母豐養而厚終。倥偬必以誠信。急切具父死事狀。白州府。聞於朝。得予特祠城西。里額曰靖忠。太學爲忠臣子。爲孝子。嗚呼。是謂克子。是謂難兄也。已。太學爲人沈毅有執守。以篤行完其身。以危身完其家。以通力後已完其交。其宗黨漂搖震撼。卒以不仆。且其置身介。是父是兄間。能以艱貞一行。與家門忠節相參立。嗚呼。豈惟舍生矢死。能不沒與。抑太學者。豈非出坎亨屯。力持成毀之會。稱其家兒者與。太學諱演。字仲長。號彌也。其先來自浙之蘭谿。著籍昆陽。入明有諱慶者。積功拜武德將軍。始祖也。傳至孝廉諱滄。購書江南滿萬卷。至比部郎。銅仁守。諱資坤。復購書萬卷。再傳至太學曾祖廩生諱應春。祖曰龍泉。令諱桂。是

生司訓公士聘諱兆旂。司訓八子。太學行四。晚惟與弟澄合饌分勞。巋然老壽。爲太平逸民。稱碩果焉。太學之生。以萬曆庚戌三月十八日卒。以康熙庚申二月二十二日。壽七十有一。德配楊孺人。先公一年生。後公八年卒。合葬冠蓋山之先塋。子從邕。澂江教授。孫二曉。晚皆諸生。曾孫七。敬學。穎學。聖學。相學。堯學。曉出。蘇學。歐學。晚出。敬學。蘇學。諸生也。先是蘇學寓其從祖父命。請爲先烈詩。蓋以入之論著歌詠之冊者也。至是復請銘太學。謹序而銘之。銘曰。

碩果不食。天孕其植。其植實好。如稼而穡。作廟渠渠。公手拮据。公帙遺書。後昆念諸。孰高其廬。庭有璠璣。

昆陽李氏族譜

滇南碑傳集卷八終

滇南碑傳集卷九

晉寧方樹梅臞仙纂輯

明儒林

艾太學傳

曾朝節

艾生名自新。字師湯。號雲蒼。雲南鄧川州人。今年五月。以選拔肄業太學。十一月二十一日。忽卒於內號舍。余聞之而悲。既如例賻恤。具香燭。屬助教王君。率同舍生哭之。復移文兵部。給勘合歸其喪。又與西廂周公。各賻奠之。然未知其賢也。一日。張生述齡來告曰。艾生蓋有志學爲聖賢者也。卽在病榻。尙日錄其所志。藏之篋中。既卒而獲覽之。皆真確切至。力行見道語。垂死神識愈定。絕未嘗及其他。余聞之而益悲。卽令張生索其所錄。至且讀且泣曰。艾生安得志行若此而夭乎。今人讀聖賢書。苟慕利祿。其於聖賢之學。究不知爲何物。然且致身青紫。富壽終身。是遵何道哉。生誠不死。必能自樹立。求所以企於聖賢無疑。然以荒陬僻壤。得生如此。雖賚志未遂。吾知其必有傳於後也。生之言曰。希聖功夫。以誠字立脚。以勇字下手。以智字覺察。以仁字聯屬。又曰。平居謀義。猶恐家修而廷壞。平居謀利。豈能忠君而愛民。是明德新民之本已。交修用力。而究未克竟其功。豈非斯道之阨耶。余典會試兩次。得天下士若干。不如得生一人。爲斯道幸。今得而復失之。其於求友之意何如哉。生年二十九耳。

產又絕遠。北學而來槐市。諸生卒無有先之者。古所謂豪傑之士非耶。今生喪且遠歸。余重悲生之數奇。爲之著論。聊以志焉。萬曆癸巳冬十一月也。二艾遺書

艾雲蒼先生墓表節錄

費炳

鄧川艾先生。年不滿三十。名方升之司徒。遂齋志以歿。先生名自新。字師湯。嘗自顏其讀書處曰雲蒼。人因號之曰雲蒼。先生讀書葉榆普寧寺七年。寺僧罕識其面。居嘗靜坐沈心。有悟卽錄。不啻億萬言。效先哲投豆。分書善惡。遇嘉言懿行。悉爲紀錄。及先生病榻日錄。悉專志聖賢之學。假令先生不卽死。其造於國家。豈淺鮮哉。先生以嘉靖乙丑五月二十九日生。萬曆癸巳十一月二十一日卒於成均。甲午十一月二十二日葬於鄧川之東山麓。有弟自修。學行與先生埒。又弟自治尙幼。先生娶何氏。生子三。長希古。仲學古。季憲古。道光雲南通志

文介石先生傳

秦光玉

先生姓文氏。諱祖堯。字心傳。號介石。晚號日月外史。雲南呈貢人。系出宋文信國公後。其先籍隸江西吉水。明洪武時。有遠祖諱龍者。隨沐昭靖率師入滇。以軍功授武威將軍職。世居晉寧。成化時。六傳至諱浩者。棄武就文。始遷呈貢。是爲先生曾祖。祖繡。父國華。三代均任儒官。國華生子二。長紹堯。貢生。官江西吉安府教授。次卽先生也。天啓辛酉。選貢。任四川名山

縣訓導。崇禎癸未。晉江南太倉州學正。甲申國變。乙酉南都繼陷。棄官從里人釋讀。徹遯跡

中峯寺。已而僑寓曇陽菴。服僧服。倚青烏術。自給。屢謀歸。未果。行順治辛丑。始首途。八月。至

湖南桃源縣。病中聞緬變。悲憤不食。卒於舟次。孫化興迎柩歸。與段孺人合葬於呈貢黃土

坡。按文氏宗譜。先生配係段氏。未赴任。先先生卒。至是合葬焉。先生德性冲和。操履嚴正。敦

崇實學。事事以聖賢爲法。挹其言論。丰采如坐春風。令人自化。在名山時。刊進修日程。以德

行學問。與多士相磨礱。士習爲之丕變。及至太倉。捐學俸。輯黌宮。整祭器。修祀典。刊儒學日

程。頒示諸生。以經籍爲依歸。以倫理爲鵠的。俾日記善過。月朔考其進退。躬行以率之。每有

辨論。則綱振條晰。發微詣極。冰解的破。一時婁東人士。奮然興起。咸謂安定復生。迨隱遯荒

菴。門人猶追隨講學。婁人無賢愚貴賤。愈益敬愛。周以粟帛。三吳士紳。以得迎致一飯爲幸。

而江浙獨行君子。則爭相延聘。歲會講演。與陸桴亭。盛聖傳。陳確菴。江虞九。王石隱。陸翼王

諸遺老。最稱投分。人皆稱爲滇南先生。僑居十七年。還鄉之日。士大夫競爲詩文贈行。繪像

作傳。以志思慕。壬寅。婁人聞訃。就曇陽菴寓室。爲位以哭。顏曰思賢廬。奉祀粟主。私謚貞道

先生。陳確菴推爲百世之師。而顧士璉以管幼安。陶靖節擬之。非阿好也。先生所著書曰儒

學日程講義十四卷。春秋晰疑二卷。周易闡微四卷。南都紀聞二卷。俱未梓而佚。惟明陽山

房詩文六卷。離憂集三卷。已刊行。乾隆中。抽燬違礙書籍。仍付劫燼。今所存者。僅有明陽山

房遺詩遺文一卷。生子二。長俊德。明季諸生。敦品喜施。鄉里稱善人。流寇之屠。呈貢也。其曾誠勿擾文善人家。家以獲全。仰承先志。隱居不出。吳三桂招之力辭。以免。著有餘生隨詠。醉禪草。次成德。孫五人。化興。貢生。化遠。舉人。官湖南澁浦縣。著有晚春堂詩八卷。均俊德出。化熙。化孚。化周。廩生。均成德出。自曾玄以下。皆能以文學世其家。亦足見先生厚德之報云。贊曰。吾呈自朱明以來。英賢輩出。代有聞人。若繆白。若殷才。若陳淳。若石銀。張薰。若郝鳳朝。陳常道。若李復宗。劉鼎新。或高蹈林泉。或捍衛城邑。或居官廉明。或臨民仁愛。固已崇祀鄉賢。增光滇乘矣。然未有備道德學問節義文章於一身。爲千古人倫標準。如介石先生者。先生其呈邑第一流人物歟。惜乎僻處邊陲。聲氣鮮通。不獲與桴亭。楊園。夏峯。二曲。諸大儒並傳於明清鼎革之際也。悲夫。羅山樓文集

明文苑

董君鳳伯墓誌銘

李元陽

君諱難。字西羽。號鳳伯山人。其先系出九隆。世居太和。有諱成者。唐咸通中爲南詔清平官。成九傳至救。仕元爲大理路判。救生銘。爲錄事司主簿。銘生寶。爲順寧司經歷。再傳有諱錄。入貢。國初授土官巡檢。欽給救命以歸。錄生禎。禎生琳。皆襲祖職。琳子四人。曰倫。曰傑。曰俊。曰儒。俊爲人恬淡。自號鶴松居士。配郡人御史楊春之女孫。生子三人。君其長也。君幼警敏。

六歲知屬對。偶長而手不釋卷。習舉子業。受春秋。酷好吟詠。遂棄舊業。成都修撰升菴楊公。謫居永昌。往來蒼洱間。每考索羣書。必曰董生董生。寓蕩山樓寫韻。彙輯轉注古音。亦惟董生侍筆硯。鈍菴王僉事序古音曰。升菴今之子雲。乃董生者。非侯芭歟。君詩有秋興八首。爲修撰所取。且爲序之。修撰涉歷游覽。必以董生相隨。謂人曰。西羽時有奇思。山水閒不可少此人。君事父母孝。待弟厚。徒以家貧。不能盡如其願。然介直不苟循人。順寧舊守以僚官后人。延之。俾爲子師。留一年。遂歸。屢以馬迎。君不復往。曰。寧甘蒼洱貧境。非吾土。不可居也。其在順寧。亦以仁恕爲開導之本。瘞骼賑饑。士人德之。蕩山有班山寺。君家先人之業。升菴公寫韻樓在焉。歲久漸廢。君雖食貧。必修葺完好。君生弘治戊午。卒丙寅正月五日。墓在聖應峯蕩山之原。原配段氏。側室楊氏。子男四人。夭者不書。今乞銘者學舒。邑庠生。段出。幼子春芳。楊出。吾鄉布衣而好學者不數人。君著書十餘種。若古音餘奇字。君其最也。君與余友非一日矣。今乃作隔世人。嗚呼。何忍銘之。何忍不銘之。銘曰。

志璞心綺。有詩孔美。於身不逢。應在子何。所求君君。藏在此。

李中溪全集

雪山大夫墓表

張含

大夫名公。字恕卿。號雪山。木氏。以金紫貴臣。世守守事於麗江。厥郡滇西雄壁也。大夫夙負奇氣。越稟儒性。童牙不爲兒戲。瞠儻而逸醜焉。讀書千百言。過目成誦。泊長不資師友講習。

而典蹟義罔弗洞悟。人皆稱之曰。此天才也。洎膺藩翰控拓之任。而雄冠萬夫。雅凌前哲。凡都會世祿者。莫與之儷。此蓋木氏世守事幾二百禩。爲臣克忠。爲子克孝。積深而報淺。乃山祗毓禎。灑氣鬯達。奕代貞誠。百靈擁衛。篤生英俊。光紹前烈。而垂則後裔矣。是故著其忠孝之行。則人無間言。而奉公憂國也。著其禦守之績。則樹勳金榜。垂名鐵柱也。著其威武之揚。則胸中之兵甲。而西賊之膽裂也。其詩學之工。則泣鬼神。驚風雨。振風雅。薄漢魏也。祀先則祠宇曠邃。而神安俎豆精潔。而時備正家。則壺儀由禮而不專。矩範崇嚴而有度。慎守封疆。而磐石鞏固。精操戎旅。而帶礪雄威。若其蒞政臨民。覩萌逆設。鑑定法嚴。雄斷靡滯。彼翹明鬪智者。其術莫騁。詭辨墜言者。其蒙靡將。是故邊隅胥靖。而土酋之衆。弗克如其境。悌成俗。而編齊之謠。卒以闡其風。大夫嘗自有言曰。吾之才也。無大過人者。獨吾之性也。則大異乎人焉。吾好儉而惡奢也。好抑而惡矜也。好功而惡伐也。古語有之。留有餘不盡之功。以還造化。留有餘不盡之財。以還百姓。留有餘不盡之福。以還子孫。斯言也。吾拳拳服膺。而罔時日忘也。於戲。儉而不奢。檢身治家之要也。抑而不矜。修身葆德之樞也。功而不伐。保身處貴之機也。爲政之道。莫大於是。是故聲光燭照。譽美星懸。聖天子親灑宸翰。以輯寧邊境。字賜之。木氏奕世之盛。益滋以大。嘉靖癸丑。疾終正寢。享年甫耳順。孰弗稷然興。喟然劇曰。大夫壽止於是耶。胡弗躋上壽。曰。胡天道無知。而施報之爽耶。含聞其言。亦駭然異。盡然傷。

曰云茲然乎云茲然乎夫壽其躬與壽其名孰大孰小壽其名與壽其世孰重孰輕大夫忠孝之名超於四際詩賦之什振乎五山況端峯君性資靈穎而才華雋逸上克肖父紹述濟美世益昌懋大夫顧嘗見端峯君之有孫而稚與端峯君趨庭聞詩禮之教久矣若是大夫之名之世將歷千禩萬禩而榮顯於無窮矣孰謂非上壽哉含以戇癡疎蕩於大夫乃同心而石交苟誠不通則交不固中不孚則聽不入是故通而孚乃誠而固有以也茲也修辭闡奧以發潛德之幽光無扛鼎之筆力亦情之所極謹闡大都表諸阡云

張禹山詩文選

張志淳傳

附子
含合

繆爾紆

張志淳字進之號南園永昌府保山縣人也性敏睿通六藝登成化甲辰進士歷官南戶部右侍郎其出官南戶部也蓋以張綵之陷綵爲稽勳郎值邊警以談兵動當事當事復詢之志淳志淳素知綵大姦險無學術意不可任以質對而馬端肅曾庭斥之公安趙給事亦訐其陰事綵始告病志淳時任選部郎陰屬爲加學行上考志淳弗允綵深銜之洎還劉瑾專政以重賂進起復爲文選郎陞僉都歷吏侍大柄在握志淳遂被劾歸歸後日惟杜門而已久之復以他事被搆幾罹大禍云志淳任選部郎時用賢拔滯門無私謁與天台黃元昭齊名正德初擢太常少卿提督四譯館懲入館子弟空名之弊一變舊習時論多之既謝病歸以圖書自娛所著南園漫錄永昌二芳記四庫全書均著錄南園集與西銘通經兵燹多散

失矣。李夢陽稱其老而傳十倍。沐劉杭三子。浙鄞陳沂稱其論道德於文章。暢性情於詩律。可以爲世訓云。卒祀鄉賢。子二。曰含。曰合。

含字愈光。號禺山。正德丁卯舉人。少隨父客京師。與楊慎爲詩友。方試場屋。聲名藉甚。公卿間。受知於其父執樂平喬宇。宇欲其速仕。令從銓選。執不可。後客梁宋。爲李夢陽所知。因師事之。所學益進。七試春官不第。嘉靖癸卯。將謁選。未及都門而返。曰。仕以行吾志也。而仕未必得志。詩言志。吾其伸於詩乎。且吾與其譁世以爲榮也。孰若寂處而自樂乎。吾將歸太保山。升明詩臺。以嘯歌畢吾志矣。於是大肆力於詩。迨楊慎戍滇西。李元陽。胡廷祿。皆挂冠歸。時相酬唱。所得益富。楊慎稱其詩博極羣書。條入葉貫。雄辯邃古。神搜靈擊。上獵漢魏。下汲李杜。寢歌途詔。鞠明究曠。弗工弗康。弗似弗止。又稱其文。句必弓左。字必科籀。萬卷之富。聚若囊括。一經之士。不能獨詁。崔銑。唐胄。任瀚。陳沂等。亦皆爲之序。備致推挹云。詩中投贈師友之什。皆情意拳拳。然常自言。凡於吐辭寄贈。在窮困節義之交。頗有萬言不竭之才。於通達周旋之友。輒有片言卽窮之拙。其風概如此。

合字懋觀。號賁所。嘉靖壬申進士。刑部主事。歷湖廣副使。以疾告歸。性嗜學。手不釋卷。善書畫。權貴造請。輒卻之。居鄉不談公事。時欲清查夷田。人心洶洶。乃爲書五千言。達之當事。遂寢。卒祀鄉賢。江西按察僉事許穀。稱其忠蓋在朝。寧事功在屏藩。勛名在彝鼎。緒餘在文章。

所著有賁所詩文集。宙載等書。兵燹後多遺失。宙載一書。民國十三年。由江蘇圖書館鈔獲。重刊雲南叢書中。

贊曰。張氏父子兄弟。文行卓卓。譽流三迤。韻著千秋。甚盛事也。或以比眉山蘇氏。豈無所見。而云然哉。志淳立朝正色。排斥奸黨。汲引幽滯。風節凜凜。不可犯。直聲震輦轂下。今尙傳其南園漫錄。足見精博。其餘多爲劫灰。可惜也。含壹志於詩。故所造獨高。評者謂其出入風雅。凌厲古今。肆而能純。華而不縲。其堅光切響。有不可磨滅於天地間者。良不誣也。蓋雖出夢陽之門。而其才力固能自爲一家矣。合之所就在事功。然其論詩云。唐人詩本於心。如太白好酒。飛卿好色。言與心符。故不可及。今人詩與心異。故格調雖規。模古人。而意味終不如。其言至允。知於此道亦三折肱矣。惜傳者寥寥。且非其上。駟吁。可悲矣。吐雲山人文稿

明卓行

馬哈只墓誌銘

李至剛

公字哈只。姓馬氏。世爲雲南昆陽州人。祖拜顏。妣馬氏。父哈只。母溫氏。公生而魁岸奇偉。風裁凜凜可畏。不肯枉己附人。人有過輒面斥無隱。性尤好善。遇貧困及鰥寡無依者。恆護調給。未嘗有倦容。以故鄉黨靡不稱公爲長者。娶溫氏。有婦德。子男二人。長文銘。次和。女四人。和自幼有材志。事今天子。賜姓鄭。爲內官監太監。公勤明敏。謙恭謹密。不避勞動。縉紳咸稱。

譽焉。嗚呼。觀其子而公積累于平日與義方之訓可見矣。公生於甲寅年十二月初九日。卒於洪武壬戌七月初三日。享年六十九歲。長子文銘。奉柩安厝於寶山鄉和代村之原。禮也。銘曰。

身處乎邊陲。而服禮義之習。分安乎民庶。而存惠澤之施。宜其餘慶深長。而有子光顯于當時也。碑鈔

永平張封君墓誌銘

歸有光

君姓張氏。諱鳳舉。字騰霄。雲南永昌人。永昌故金齒也。洪武中。沐國公平雲南。永昌初未置郡。徙京民居之。張氏世家金陵。今二百年。爲金齒人。其縣曰永平。其世系事狀在別記。君少力田。自奉菲薄。性介特。爲巧黠者所嗤笑。然不爲意。雖貧而尤喜賙人。子德化。隆慶二年。試禮部不第。試吏部。時天下謁選者數百人。德化試第一。爲中書舍人。德化貧不能自給。猶節縮祿廩。寄遺以爲養。于是德化在中書二年餘。永平有上計吏來京。云君已歿。而無家問。德化悲痛。疑不肯以爲信。計吏云。以某月離其縣。過舍人門。見皆衣縗。又知其歲正月。君出赴鄉飲。人言老舍人殊衰憊。至扶以還家。亡何聞有疾。疾少間。能自扶起。人又曰。老舍人亡恙矣。間一月盡死。死作遺令。檢篋中文書。爲數封。各有記。以俟舍人歸。且言其月日時。皆有據驗。德化號踊發喪。蓋君以隆慶四年三月庚寅卒。年七十有五。配劉氏。慈而能教。德化初借